

ASO GAFUA, 20 SETEMA 2021

Na nofoia e le Fofoga Fetalai le Nofoa i le itula e 9:25 i le taeao.

Tatalo.

FOFOGA FETALAI: Ou te faasilasila atu ua toe amatalia nei Taulumaga a le Fono Aoao Faitulafono.

Ia, avea ia lenei itula e faafeiloai atu ai i le paia o le tatou Palemene i ona tulaga faalupeina, i le afio o lau Afioga i le Palemia faapea foi le mamalu o lau Kapeneta, aemaise foi Afioga i Minisita Lagolago ma lea itu o le malu. Ia, e faatalofa atu foi i lau Afioga i le Taitai o le Itu Agai e faapea foi lea Itu o le Malu ia te outou sui usufono mamalu o le Palemene. Faamalo le soifua. Faafetai foi le lagi e mama i lenei taeao fou, o lea ua tatou feiloai i le Maota nei aua foi o tatou tiute ma galuega e pei ona tofofi i ai i tatou e le Atua tatou te galulue ai. Malo lava le soifua, malo le lagimama.

Ia ou te talitonu foi o lenei aso, o se aso aua foi a tatou galuega masani e talitonu lava i le agalelei o le Atua ma Lana tausiga, aemaise foi o le fesoasoani mai ia i tatou o e ua avea ma Taitai ina ia faatino ai le tatou galuega i Lona finagalo ma Lona faamaoni. O le mea lea, ia, manuia lenei aso ma le tatou usugafono i le mamalu o le Palemene.

TULAFONO TAU FAAOFI O LE FAATATAUINA O TUPE 2021/2022 – felafolafoaiga i luga o le faitauga faalua – Aso 4

FOFOGA FETALAI: E tolopo Galuega a le Fono Aoao i le aso Tofi, 16 o Setema o lo o saunoa le sui usufono mo Aana Alofi Nu.4.

O le mea lea, tulai mai le sui usufono e faaauau lau saunoaga. Ma le agaga faaloalo.

Susuga Hon Tuilaepa Fatialofa Auelua Sailele Malielegaoi (Taitai o le Itu Agai): Lau Afioga i le Fofoga Fetalai, e talosagaina sina avanoa...

FOFOGA FETALAI: Tulai mai le Taitai o le Itu Agai.

Susuga Hon Tuilaepa Fatialofa Auelua Sailele Malielegaoi: E tapa ai le Nofoa, o si tamai mea laitiiti lava lea e fia malamalama ai i sau fesoasoani.

FOFOGA FETALAI: Ia, o se mataupu tau Tala o le Tupe po o se isi mataupu lau Afioga?

Susuga Hon Tuilaepa Fatialofa Auelua Sailele Malielegaoi: O le mataupu lava tau Tala o le Tupe.

FOFOGA FETALAI: Ia, o le avanoa leni i lau Afioga.

Susuga Hon Tuilaepa Fatialofa Auelua Sailele Malielegaoi: Lau Afioga i le Fofoga Fetalai, ia ua i luma o le Atua le tatou faafetai ma le faamanu i le taitaiina mai o lou soifua faapea foi le soifua o le paia maualuga o lena Itu i lau Afioga i le Palemia e faapea foi le Kapeneta ma lena Itu o le tatou Maota, e faapea foi leni Itu. E momoli ai le faamalo i lau Afioga. E taua le tatalo na e tuuina atu i le Atua i Lana pule faa-soifua ina ia maua e i tatou le agaga o le loto faamagalalo, ae faapea foi le tulaga o le faagasologa o le tatou galuega. E le toe agai foi i tua se upu, pau o le mea o le tuu atu o matou tauau e faagasolo lelei ai le tatou galuega, ina ia sologa lelei ma agai i luma le tatou galuega.

O le ala lea o lou tulai atu ona ua tautuauega le matou oo mai i totonu o le Maota nei, ae le mafai lava ona aveesea le matou galuega o le tuualalo i lau Afioga i le faagasologa o le tatou galuega e tusa ai ma tatou Tulafono Tumau.

E matauina lava ma le totoā le vaiaso foi talu ai na faatauto ai matou, ia, ma aumai foi taiala o le amiotonu e faatino ai galuega a le tatou Maota nei. O matau mai foi le atunuu, o tatou foi o auauna a le atunuu tatou te faia mea lelei mo Samoa o lo o tapuai maia o tatou faiva.

O le ala lea o lou tulai atu i le tausisia foi o taiala sa e faitauina mai, taiala o le amiotonu e limataitaiina ai le Maota leni. O lea sa matou faatauina, a o le faalavelave ua tautuauega mai matou ae ua faagasolo le galuega. Ia o lea foi e tau faamaea saunoaga a lena Itu ona agai mai ai lea i le matou nei foi Itu. O le itu o lo o faataua, ona o lea ua taoto le lafo i le faagasologa o galuega, ua faataatiaese ai le tulaga masani o le Tulafono Tumau e 133. O le ala tonu lena o lea ou te tulai atu ai i le le avea o le tatou Tala o le Tupe i le tatou Komiti o Mea Tau Tupe, ona o le latou galuega lea o le amiami o Matagaluega ina ia faamatala auiliili mai le Tala o le Tupe, atoa ai ma faiga faavae ona aumai ai lea o le latou fautuaga i totonu o le Maota leni. O a foi ni tulaga faaletonu o lo o matauina e latou, ia, ona faasaosao lea e latou ona faatoa aumai ai lea i le tatou Maota nei, o le Komiti o sui o le Palemene leni, latou te matauina ni tulaga faaletonu i le latou galuega. E amiami uma

lava Ofisa Sili o Pulega o Matagaluega ona aumai ai lea o le Lipoti i totonu i i faatoa alu loa a tatou saunoaga. Ia alu la saunoaga...

FOFOGA FETALAI: Ia, ou te vaelupeina le saunoaga a lau Afioga.

Susuga Hon Tuilaepa Fatialofa Auelua Sailele Malielegaoi: O lea se i agai tonu atu lava i le mataupu lea...

FOFOGA FETALAI: O lea ua maua lou finagalo lau Afioga i le Taitai o le Itu Agai.

Susuga Hon Tuilaepa Fatialofa Auelua Sailele Malielegaoi: Leai, le i oo i le tulaga lea o le 35 ma le 45.

FOFOGA FETALAI: O lea ua maua atu lou finagalo lau Afioga i le Taitai o le Itu Agai, o lea foi ua manino auofala i lou finagalo ma le faaaliga ua opea nei i le Maota, ae manatu lava, ia, e talitonu lava o le tatou galuega e faatonuofolau lava i Tulafono. E moni lava ua tautuauega lena Itu o le Maota, e faamaoni, e talitonu. Ae talu ai ua see le sa o le Malo ma le faigamalo i le tulaga ua faatuina ai le lafo ma ua pasia aloaia i totonu o le Palemene, o le ala lena o lea ou te faamanatu ai i lau Afioga i le Taitai o le Itu Agai. Faafetai o lea ua e faaaliga lena tulaga. Ae o lo o manino lava a tatou Tulafono Tumau 78(8), o le a lava le lafo ua faatu ma ioeina i totonu o le Palemene, ae le mafai ona toe solomuli ma toe ta i tua le tatou galuega.

O le mea lea, o lea ua maua lou finagalo, a o lo o maua lava o tatou avanoa. O lea e le i oo i le taimi e lauga ai tatou, aumai outou finagalo, a o le Komiti, o lea lava ua maua lou finagalo. O le mea lea, o le faamalamalama lea i lau Afioga i le Fofoga Fetalai.

Susuga Hon Tuilaepa Fatialofa Auelua Sailele Malielegaoi: Lau Afioga i le Fofoga Fetalai o lea ou te talanoa atu i le 35 ma le 45 o le tatou Tulafono Tumau. O le Vaega 35 ma le 45 e faatonutonu ai le faasologa o tatou galuega. A o le Vaega 46 ma le 139...

Afioga Hon Fiamē Naomi Mataafa (Palemia): Lau Afioga i le Fofoga Fetalai, o le mea e fia faasao...

Susuga Hon Tuilaepa Fatialofa Auelua Sailele Malielegaoi: O le 139... Se i maea lau...

FOFOGA FETALAI: Se i onosai mai lau Afioga i le Taitai o le Itu Agai se i tuu i le Malo... leaga o le Malo e ona le lafo. Ia, lau Afioga i le Palemia.

Afioga Hon Fiaame Naomi Mataafa: Faafetai mo le avanoa. E piiama foi i le faafetai siitia i lenei taeao. Faafetai ua alafai mai le Maota o Samoa i faguga lelei, lagimama ma le soifua manuia. Ua ou faalogologo ma le totoia i le mataupu o lo o laga mai e le Taitai o le Itu Agai.

Ae ua ou tulai atu lau Afioga i le Fofoga Fetalai, o le mea e fia faasao, o le upu lea na saunoa i ai le Taitai, tautuauega. E le solomuli le galuega a le tatou Maota. Ma e sa tatou uia ala o le Tulafono Tumau, o lea ua taatia ai le lafo ma ua faamaonia.

Ma ou te manatu foi lau Afioga i le Fofoga Fetalai, a oo loa i le tulaga o le faitauga auiliili o le avanoa lena o le Maota atoa, ma ailoga foi e sili i se Komiti i le silasila a sui usufono uma o le Maota i le tatou Tala o le Tupe.

Ae lau Afioga i le Fofoga Fetalai, ia lea tatou te iloa le faasologa o le tatou mataupu, sa le mafai ona au mai le la Itu o le Maota i le la vaiaso i le amataga o le tatou galuega. Ma e faigofie ona fai se fuafuaga e fai se Komiti a le Vaega lenei, ae o le mea lea na ae ai se manatu, e sili le fola i luma o le malae lea e faafogafoga uma mai i ai le atunuu.

O lea la, ou te faamalie atu, malilie maia lau Afioga i le Taitai ma lena Itu o le malu ua see le tatou fuafuaga. E tele foi le avanoa tou te silasila ma saunoa ai ma fesiligia foi le Afioga i le Minisita o Tupe e tusa ai ma le tatou Tala o le Tupe. Ae ou te tatalo atu, faaauau ia le tatou galuega. Ma le faaaloalo.

FOFOGA FETALAI: Faafetai. Ou te talitonu ua faamalieina lau Afioga i le Taitai o le Itu Agai. Onosai mai lava se i fai atu se tala a le Nofoa. E pei lava ona faailoa atu le tulaga o le tatou Tulafono Tumau ma tatou galuega fai, e le mafai ona tatou toe solomuli i tua, o lea ua see le sa o le Malo ma le fonotaga aua le tatou Tala o le Tupe.

O le mea lea, ou te faamalulu atu ma faamalie atu i lea Itu, a lailoa lava lau Afioga e tau faailoa mai a tatou Tulafono Tumau, na o le Nofoa lava na te faaliliuina ia tulaga, o le mea lea..

Susuga Hon Tuilaepa Fatialofa Auelua Sailele Malielegaoi: Lau Afioga i le Fofoga Fetalai, e leai se isi e faatautee i lou taofi. Na o le pau lava le mea sa ou fia faapupula i ai le Maota lenei ma le atunuu, o lea tatou te sosolo i luga o le Tulafono Tumau. A silasila i le 139 o lo o taua mai ai i ina i le 139...

FOFOGA FETALAI: Lau Afioga i le.... ou te vaelupeina le saunoaga a lau Afioga...

Susuga Hon Tuilaepa Fatialofa Auelua Sailele Malielegaoi: Se i maea atu lau...

FOFOGA FETALAI: Onosai mai se i fai atu lau tala. Ua tauau ina tatou see ese ma tatou tulaga faa-Fono. Ia fai foi ma silasila mai i le Nofoa, o lea ua uma ona faamalulu atu, ua faamalulu mai foi le Taitai o le Malo. Ma e le mafai ona tatou toe solomuli i tua, o lea ua faaauau le galuega a le Palemene. E le avea foi le naunau mai o lau Afioga ma lena Itu e toe solomuli ai galuega a le Palemene. O lea ua faaauau galuega a le Palemene, o lea ua tatou galulue faatasi, ia tatou feoeoeai, o a mea... O lea e manaia lau saunoaga ua tautuauega. O le uiga o le tautuauega, ua omai ua faagasolo isi mea ua tataua ona fai.

O le mea lea, onosai le tautuauega o lea ua faagasolo a tatou galuega. O le mea lea...

Susuga Hon Tuilaepa Fatialofa Auelua Sailele Malielegaoi: O le a onosai le tautuauega. O le a ou onosai. Ae ou te faamalie atu foi la, na o le pau lava le mea sa ou fia agai i ai, o le faamanino i lalo o le 139, o le faatulagaga o tatou galuega, e pulea lava e le Malo....

FOFOGA FETALAI: O lea ua manino.

Susuga Hon Tuilaepa Fatialofa Auelua Sailele Malielegaoi: O lea ua ou talanoa atu. Ae a oo loa i le Tala o le Tupe, ona le faapena lea ona faagasolo.

Ae ou te fautuaina lau Afioga, se i toe silasila i le 139. E oo loa i le talanoaina o le Tala o le Tupe Autu, e le mafai ona pulea e le Malo ma faatonutonu mai e le Malo le polokalame...

FOFOGA FETALAI: Ia, tulai mai lau Afioga i le Palemia.

Afioga Hon Fiamē Naomi Mataafa: Lau Afioga i le Fofoga Fetalai, o le mea e fia faasao.

Susuga Hon Tuilaepa Fatialofa Auelua Sailele Malielegaoi: O lea la, ua ou io atu i lau saunoaga, o le a ou nofo i lalo, ma o le a faagasolo le tatou galuega.

Afioga Hon Fiamē Naomi Mataafa: Ua solifono tele le Taitai o le Itu Agai ma le faaaloalo i le Nofoa.

Susuga Hon Tuilaepa Fatialofa Auelua Sailele Malielegaoi: E le o malamalama le Palemia i le mataupu lea ou te laga.

Afioga Hon Fiaame Naomi Mataafa: Lau Afioga i le Fofoga Fetalai, a fia Fofoga Fetalai, e sili ona afio atu i ina, o lau Afioga o lo o faafoeina le tatou Fono. Ae onosai mai le Taitai o le Itu Agai, ua ese le mea lena e te nofo ai.

FOFOGA FETALAI: Ia, e faamalulu atu foi i lau Afioga i le Palemia ma lea Itu o le tatou Maota. Ua faafogafoga foi Samoa, ia o le tulaga lava ia tatou galulue faatasi. Faafetai o lea ua lagonaina foi e lau Afioga i le Taitai o le Itu Agai ma lena Itu, ia, o le tatou galuega e tausoa. O le mea lea....

Susuga Hon Tuilaepa Fatialofa Auelua Sailele Malielegaoi: Lau Afioga o lea ua ou talia. O lea ua ou talia lau faatonuga ou te nofo i lalo ma faagasolo le tatou galuega.

FOFOGA FETALAI: Faafetai. Tulai mai le sui usufono mo Anoamaa e faaauau lau saunoaga. Oi, o Aana Alofi Nu.4.

Afioga TOEOLESULUSULU CEDRIC POSE SALESA SCHUSTER (Aana Alofi Nu.4): Faafetai i lau Afioga i le Fofoga Fetalai mo le avanoa. May the words of my mouth and meditation of my hearts be acceptable in my God... Cedric.

Lau Afioga i le Fofoga Fetalai, e faatalofa atu i lenei taeao, ua maea ona e paelago lo tatou Maota, ua sii foi le viiga i le tatou Tapaau i le Lagi e amatalia ai le tatou Fonotaga i lenei taeao. O le a le toe oo foi i ai se leo o Aana Alofi Nu.4, e le o Anoamaa.

Ae o le a oo loa i se faafetai foi mo le avanoa ua mafai ona toe faaauau ai se manatu o lenei itumalo e tusa ai o le Tala o le Tupe. Lau Afioga i le Fofoga Fetalai, pau se lagona po o se vaivaiga o lenei sui usufono ona o le itumalo leni o Aana Alofi Nu.4, e silia ma le 6,000 ona tagatanuu o lo o i ai i totonu. I le faataotoga foi o lea itumalo, e matauina ai ua silia ma le 75% o ona tagatanuu e le i ausia le tulaga lea o le Form 5 ma le Form 6. O le tele la o tagata o lenei itumalo, e talitonu foi o le tele lea o le tatou atunuu e le o mafai ona ausia tulaga e mafai ona lelei ai aoaoga.

E tusa foi pe na o le 40% o lo o i ai galuega e faigaluega ai. E tele la manaoga e ao ona faalelei o lenei itumalo aua o le faanaunautaiga foi lau Afioga i le Fofoga Fetalai, ia maea leni 5 tausaga ua mafai ona siitia le tulaga o i latou e faaleleia aoaoga, ma i latou e mafai ona maua galuega ma auaunaga ina ia mafai ona maua le soifua lelei ma le soifua manuia o le itumalo.

Ona ou oo mai lea i le Tala o le Tupe lau Afioga i le Fofoga Fetalai. Ia, o le a amata atu i le Matagaluega o le MCIT po o le tatou Communication. Lau Afioga i le Fofoga Fetalai, e fia maua se malamalamaaga pei ona faaalua i le Tala o le Tupe, ua toe i ai foi nisi miliona se tele ua toe ave i le tatou SNBH. A tau matau atu lau Afioga i le Fofoga Fetalai, ia po ua toetiti 10

tausaga o ave i ai seleni, a o lenei lava e le i fua lelei mai se manuia o le tatou atunuu. Ia atonu e i ai se manatu po ua tai lata ona maua ni tatou galuega ma faaleleia auunaga a le SNBH ona e talitonu o le vaega foi i le taimi na amata mai ai, o le faamoemoega sa i ai ina ia mafai ona faafaigofie auunaga a Matagaluega a le Malo e aofia ai fomai i itumalo, o aoga, ae le o mafai ona faaleleia atoatoa nei auunaga. E talosagaina ai le Afioga i le Minisita aemaise foi o le Matagaluega, po o le a se lata mai e mafai ona faaleleia ai nei tulaga.

Lau Afioga i le Fofoga Fetalai, ona ou see mai lea i le Minisita o Aoga. Lau Afioga i le Fofoga Fetalai e tauala atu, e talosagaina lava o le tele o alo ma fanau a si o tatou atunuu o lo o aotauina i Fiti. E talitonu o le tele o nisi atunuu ma fanau o lo o aoga ai i USP ma totonu o aoga eseese i totonu o Fiti, ua tele ina toe foi i latou atunuu. A o nai alo ma fanau a si o tatou atunuu o lo o tagi mai pea ua fia oo mai i Samoa. Po o i ai se fuafuaga ina ia vave ona aumai nai nei alo ma fanau.

Lau Afioga i le Fofoga Fetalai, e taua foi le vaega lea o grant allocations ia e maua a afioaga ma aoga. O le talosaga pe mafai ona toe silasila i ai. Muamua, ia toe siitia mai le \$100. Pe i ai se fuafuaga ina ia mafai ona siitia ai po o le \$150 e fuafua i ai i alo ma manaoga o aoga. E le gata foi i lea lau Afioga, o le i ai o le flexibility lea, ona o le tele o afioaga e taua vaega ia o maintenance ma capital development ae le o mafai ona faatino atoatoa ona e laiti allocation ia e i ai i totonu o le tatou grant. Pe mafai ona maua le flexibility e fetuutuunai ai i totonu o aoga ma latou manaoga.

Ona ou oo mai ai lea lau Afioga i le tulaga lea o faiaoga. E matauina pea o lo o faaalua pea o le itiiti o faiaoga a le tatou atunuu i totonu o aoga. O lenei foi itumalo e i ai vasega ua tai 60 tamaiti i le faiaoga. O le tele lava o vasega e tai 40. A o le talosaga i lau Afioga i le Minisita e tauala atu i le Afioga i le Fofoga Fetalai, o le tele lava foi o nisi o alo ma fanau o lo o faigaluega i le Malo. Faataitaiga o le matou itumalo, e tele lava i latou o lo o faigaluega i le AA. Ia a mafai ona faaoga avanoa faa-part time pe substitute ai i aoga ia. Ou te talitonu foi o lo o tele le afaigaluega a le Malo e mafai ona avea nisi mataupu. Ou te tau manatua lau Afioga i le Fofoga Fetalai le tulaga foi lea sa ou faia e au ia i le taimi faatoa ou foi mai ai. E faaavanoa lava e tai lua vasega ta te alu e faiaoga ai i Avele ma isi aoga, e fesoasoani ai e relieve ai i le le lava o faiaoga i lenei taimi.

Ia lau Afioga i le Fofoga Fetalai, ua talanoaina foi le tulaga lea i tatou pre-school, o lo o taumafai lava ina ia atinae pre-school, ona o le tasi lea o vaega taua i le amatalia o le olaga aoga o fanau. E talosagaina le faaopoopo i ai o tatou grant ma le totogiina o faiaoga, ma le faaleleia foi o lea tulaga i totonu o afioaga ma alaafaga.

Ona see mai lea lau Afioga i le tulaga o taaloga. Faafetai o lea ua matau atu ua siitia ma taumafai e faaleleia auunaga tau taaloga, ona o se tasi lenei... i lou nei sui usufono ou te talitonu o le tasi lenei lumanai o le tatou atunuu,

i le tulaga lea a lelei taaloga, o le a mafai foi ona maua galuega e le na o tagata taaalo a o isi uma vaega e mafai ona lagolagoina se tama taalo. O lea e talosaga atu ai i lau Afioga i le Fofoga Fetalai, ina ia faateleina ma tapena lelei, o lea ua lelei tatou faletaalo. Ia mafai foi ona silasila le Matagaluega ma le tatou Malo i le expand ina o le tatou sports tourism, ina ia le na o taaloga taualoa faa-Pacific Games, a i ai foi isi semi-professional po o amateur events e mafai ona faaaogaina ai a tatou malae, e le gata foi i lea o le kolegiina o pro-teams, ia mafai ona faaaoga tatou facilities e fai ai latou pre-seasons. Ou te talitonu o le tele o nei avanoa o le a mafai ona faaleleia ai tatou facilities, e maua ai foi le avanoa o alo ma fanau a le tatou atunuu e siitia ai le latou tulaga i le tulaga o taaloga.

Lau Afioga i le Fofoga Fetalai, ona see mai lea i le Matagaluega o le Justice. E i ai foi se lagona o lenei sui usufono lau Afioga i le Fofoga Fetalai i le faatauaina o le independent o le tatou Judiciary ina ia faatau lava le faiga o latou faaiuga aemaise foi le tulaga tau i le latou Budget ma le JSC. E taua foi lau Afioga i le Fofoga Fetalai le toe silasila ane i se tasi o anavatau o lenei Aiga o le Faatuatua i le Atua Samoa, o le toe iloiloina lea o le Tulafono lea o le LTA 20.

Lau Afioga i le Fofoga Fetalai, e i ai foi se lagona i le vaega lenei e pei o le Law Reform Commission, ona e matauina, ua tele Tulafono i totonu o le tatou Atunuu. Ae tele ina fesopoai nisi o Tulafono, contradict isi Tulafono ma isi Tulafono. Atonu o le vaega tonu lea, e ao ona latou toe silasila ma faatau, prioritize le harmonize ina ma le consultation o Tulafono ia lau Afioga, e faafaigofie ai galuega a le Malo ma le malamalamaaga o lo tatou atunuu.

Lau Afioga i le Fofoga Fetalai, ona ou see mai lea i le Matagaluega o Tina ma Tamaitai. E faafetai lau Afioga i le Fofoga Fetalai, o lea ua maua atu i le Tala o le Tupe, ua siitia le totogi o sui o nuu ma sui o tamaitai. Sa tau tomanatu foi sa i ai le vaitaimi sa i ai polokalame mo talavaou, e toe talosagaina le toe faamaopoopo o lea vaega. Ona o le toatele o le tatou Atunuu o lea e i totonu o le vaega lea o talavaou. E faatino ai polokalame, ona o le toatele o alo ma fanau, e vave ona tuua aoga. Ae ia lelei ni polokalame i totonu o alalafaga ma afioaga, itumalo aemaise o le tatou Atunuu, ina ia atinae ai, e le gata o galuega ae o nisi foi o latou aoga e contribute ai i lo tatou Atunuu.

Lau Afioga i le Fofoga Fetalai, ona ou see mai ai lea i le Matagaluega o Leoleo. Ua faamalo i galuega o lo o feagai ai ma le Matagaluega o Leoleo. O le tuualalo ma le talosaga, e vaai atu o lea ua i ai i totonu le faataatiaina o le tatou Police Academy, atonu o se vaega taua foi lea, ua tataua loa ona fesoasoani ai foi i alii ma tamaitai leoleo. E le gata i lea o le talosaga, o le silasila foi lea i isi opportunities i isi a tatou Atunuu i paaga, ina ia mafai ona maua ai ni attachments o le tatou force. E o atu i ai ma faalateleina ai lo latou tomai, ina ia foi mai a o la foi ua i ai le tomai. Ia le na o le o i aoga ma

avanoa o lo o i ai e faapei o le UN. Ae a maua foi ni avanoa mo nai attachment, ae ou te talitonu e tele foi se tomai o le a mafai ona faasoa mai, ma siitia ai le latou auaunaga.

Ona oo mai lea lau Afioga i le Fofoga Fetalai, i le tatou Electoral Commission. Atonu e tasi lenei Tulafono e aupito sili ona sui soo i le Nofoaiga ua tuanai atu. E talosagaina, o lea e vaai atu o lo o i ai se tupe ua faataatia, e mafai ona tapena lelei, ia tasi ai lava le amend ina o le tatou Tulafono. O le faataatiaina foi, po o le tapenaina o i latou e faia se review o le tatou palota ua tuanai atu. E ao ona vaavaai lelei i tagata e mafai ona i ai, ia aua ne i pei o le mea e masani ai, na o e lava e faiaina mai i le palota e i ai i totonu. Ae ia i ai se lautele o le tatou atunuu, e mafai ona faasoa ma faatasi uma i ai.

Lau Afioga i le Fofoga Fetalai, ona ou see mai lea i le vaega lea o le Soifua Maloloina. E momoli le faamalo i auaunaga i tausaga ua tuanai a le tatou falemai. E pau le vaega e fesiligia ona e le o maoti mai i le tala o le tupe, pe ua toe faaauau le tatou overseas medical scheme lea e i ai, pe fia foi se vaega o i ai. O le faanaunautaiga lau afioga, pe mafai ona silasila le Minisita i le toe review ina o lea avanoa. Ua tele foi alo ma fanau a Samoa o lo o i atunuu i fafo, o lo o i ai lo latou tomai, e mafai ona latou assess ina nisi o tatou mai, pe afai e finagalo e ave i fafo. Ona o lea e matau atu, o le tele lava o tausaga e pei e tasi lava le consultant lea sa faaoga e faia maia le review. A o se avanoa foi lea e faaoga mai ai alo ma fanau a Samoa o lo o i fafo.

Lau Afioga i le Fofoga Fetalai, e talatalanoa atu foi, ona o le tatou SNBH e pei ou te matau i le 8, 9 tausaga tausaga talu ai i le launch ina, e tasi lea vaega sa launch ai o le falemai. Ma i ai ma le faaupuga, e mafai ai ona nofo atu le fomai i Apia ma fai diagnoses ma siaki le mai la e i Sataua po o falemai i nuu i tua. Ou te le iloa pe na o le for show lena na fai ai i lena aso, po o ua faataunuu. Ae talosagaina ona o lo o matauina pea le sioti o fomai i nuu i tua. Ae ao ona toe faaleleia lea auaunaga e mafai ona faatino ai. E i ai foi specialist i Atunuu i fafo, e taua foi lo latou sao, e mafai ona fesoasoani mai ai, pe afai e lelei lo tatou broadband.

Lau Afioga i le Fofoga Fetalai, o lea lava itu, e talosagaina ai foi le silasila o le Afioga i le Minisita ona o le tele o tatou alo ma fanau o lo o i fafo o lo o lelei foi i galuega faafomai, ma nisi foi o tomai. E tele lava polokalame ta te vaai i ai, e pei foi o le doctors without borders. A mafai ona tapena foi ia vaega, e maua ai avanoa e omai ai fomai e fesoasoani e relieve a tatou fomai iinei i Samoa. E i ai foi taimi faapitoa e mafai ona omai fai ai taotoga, e atili lava ona i ai sootaga a i tatou nei, ma alo ma fanau o lo o faapea ona aumai i atunuu i fafo.

Lau Afioga i le Fofoga Fetalai, ona ou oo mai lea i le tulaga lea, o le vaaiga ona ua fai si tele o le tupe lea e alu i le teuga o fanau o tatou falemai. E talosagaina foi, e piinama foi e pei ona faaali e se tasi o sui usufono lau afioga. O le faamatuu atu loa o le faamamaina, o le aoina o le lapisi aemaise ai foi

o le security o falemai faaitumalo, pe mafai ona faamatuu atu i itumalo ma afioaga. O le matou nei itumalo o Aana, o lo o i ai le falemai i Leulumoega ma le falemai i Satapuala. E maua ai foi galuega a nei sui o matou itumalo, e le gata i lea, o le a vaavaai tele ma o le a galulue faatasi ai foi le itumalo.

Lau afioga e fia maua sina....

FOFOGA FETALAI: Toe 2 minute o le sui usufono. O na e lava au minute, faauma mai loa lau lauga.

Afioga TOEOLESULUSULU CEDRIC POSE SALESA SCHUSTER: E toe lima (5) Minisita lea e le i oo atu i ai lau afioga, ae o lea o le a usitai.

O atugaluga lau Afioga i le Minisita o le Soifua Maloloina, e fai si tele o le \$1.2 miliona lea e alu i plumbing works. A vaavaai ma silasila i ai lau afioga ma le tatou Atunuu, o le tele o nei falemai, e le i atoa se sefulu (10) tausaga talu ona faatino. Aisea ua tele ai le tupe ua alu i plumbing works nei? A fai o le fale fou, sa le tatau ona tele se tulaga seleni e alu ai.

Ona ou see mai lea lau afioga i le tatou MPE, ua faataua lava lau afioga ona tasi lenei..ma le MCIL, e tasi lenei o faanaunautaiga o le tatou Faigamalo ma le tatou Atunuu, ia lava avanoa faigaluega. E talosagaina e ala lea i le BASER i le faatalanoaina foi, e pei o le Malo o Amerika Samoa ina ia fai lelei se tatou grade trade agreement, e mafai ona faafaigofie ona avatu ai fua o faatoaga, ia maua foi galuega a lo tatou atunuu e autovaa tu i ai. Ia le na o le RSE e o ai i fafo, ae faaoga foi tomai i nisi e le gata o Tutuila, a o nisi foi atunuu o le Pasefika. E talitonu lou nei sui usufono, ua tele le tomai i totonu o lo tatou atunuu, ae le o lava galuega. Ae o lea e mafai ona faasoa atu, ma maua mai ai foi seleni mai isi Atunuu.

Ona ou oo mai lea lau afioga i le vaega MWTI. E vaai lava ma le faanoanoa lau Afioga i le Fofoga Fetalai, i le tele o auala ua faatino, manaia auala i taimi e tatala ai auala o nuu ma afioaga. Ae pe lua (2) tolu (3) tausaga ae leaga. O si ou vaivaiga e talosagaina ai le faamalosi o construction goals, ma o lo o i ai foi aiaiga e tatau ona faatinoina. Ia aua le faia ona ia manao e fai se auala, ae ia fai ia lelei. Aua a lelei le faiga, e umi ona faaogaina e le afioaga ma itumalo ma maua ai le penefiti o le tatou Atunuu.

Ona oo mai lea i le vaega o Agriculture. Ia e faamalo i le Minisita ma atinae o lo o fuafuaina. O le talosaga lava ina ia mafai ona faaleleia ia vaega ia tau faatoaga aua se lumanai o le tatou atunuu.

Lau Afioga i le Fofoga Fetalai, o le a faauma atu ai i i, se manatu o lenei itumalo. E muamua lava ona avatu le faafetai i le tatou mafutaga i lenei taeao. E faafetai i le Palemia ma le Kapeneta ma sui a Minisita. E faafetai atu i lea itu o le Maota, aemaise o le aufaigaluega a le Malo. E talitonu o le a mafai ona tatou galulue faatasi aua se lumanai manuia o Samoa.

E avatu foi le agaga faafetai i lau Afioga i le Fofoga Fetalai i na i ou aiga ma i latou sa lagolagoina lau taumafaiga. O le a taumafai lava i le mea e gata

mai ai le mafai, ina ia maua ma faaleo lo outou leo, aemaise se lumanai o lo tatou Atunuu. Ia faatasi mai le Tapaau i le Lagi, vaega o totoa o lenei Fono. Soifua.

Na faaalua le agaga fiafia o le Maota i le patipati o latou aao i le maea ai o le Saunoaga Faa-Taupou a le sui usufono mo Aana Alofi 4.

FOFOGA FETALAI: Faafetai saunoa i lau Afioga i le sui mamalu, o lea foi ua agia i le Maota, aemaise foi o le faafogafofa mai o le Atunuu ia fautuaga i lo tatou Malo. O lea foi ua faafogafofa ma le totoa le Palemia ma le Kapeneta aua foi le faagasologa o galuega, e le gata o lou itumalo, ae o lo o oooo lava i le Atunuu atoa lau faatofalaiga. O le mea lea, malo le saunoa, faafetai le tofa, faafetai tapena i lenei aso ma le tatou Tala i le tupe.

O le avanoa lenei, ou te iloa o lea ua see mai i lenei Itu o le Malu. Ia o le avanoa lea o sui mamalu aua le tatou Tala i le tupe.

E matau atu o lea ua tulai mai le sui mamalu mo le Vaa o Fonoti. Malo faafetai, e manaomia foi sou sao aua le tatou Tala o le tupe. Manuia lau saunoaga.

Tofa MAUU SIAOSI PUEPUEMAI (Vaa o Fonoti): Lau Afioga i le Fofoga Fetalai ma le mamalu o lenei Maota. Sa i ai le taofi o le falepou na taoto. Sei faatoa siva lava ma saasaa le vaa e tasi o Samoa ma lona tuiga e tualuga ai saunoaga faale-taupou o le Maota. Aepeitai o lea ua ila le masina vaaia i lau puletofi i lenei taeao, ua sasao lenei itumalo o le Vaa o Fonoti, se i sufi se lagona, ma momoli ni motugamanatu aua le tala faatatau o le tupe, lea ua opea nei i le Maota. Ona ou manatu lea e le failoto le nuu o manu. Ae ou te le i laasia le niu aemoe ma sopoia le tosogaaulama na i Malaefono ma Poutalie, e pei o le tala na fai i atua Sasae. Ou te muai see faafalasiu ae faamalama i mauava e pei o le fetalaiiga ia Saveasiuleo. Ina ia aua ne i fesootai le vai na liugata, ma le au ma le maluapeau ua le paia o le Maota o Samoa, o le Maota e fai mai e leo e le aveitatala, ma le auafa mau e mapu i ai le auogetafi ma le laseiga na aami. Aua o lele ua le gataitalia le gataifale i le lagimalu ma le faasauga o Ao i Taitai o le Malo. E viia ma faafetaia le Atua, aua ua sola le po ma ona faigata. A o lea ua fotu manu ataata o le taeao fou, ua malamagia ai i tatou i le matagofie o Lona alofa ma Lona agalelei. O lea ua tatou laulua fesilafai ai i le lagi matafi ae le o le tulouna o le lagi.

E faamalo le soifua manuia i lau Afioga i le Fofoga Fetalai. E manatu o lea ua tapisa galutua ma galutau o le vasa. Aua o lea e mamau foi ligo o le vaa e tasi i le atunuu. A ua amata ona maneenee, e mafua i se a? Se i mataitu tafega o le au. Pe o ni peau e lagavale pe o ni peau e matamata loloa. O le vaa ua masani i ava galua ma so o se itutai o le vasa. O le vaa foi ua masani i le laueleele i le goa ma le laulelei. E masani foi i le vanimonimo i ao fegasoloai ma le puao. Ioe, lau Afioga i le Fofoga Fetalai, e tasi lava le vaa

ia Samoa atoa, e na o le Vaa o Fonoti. Ona ou faapea lea, o le vaa o manu e le taetala i le seeti. O le ala lea ou te sosoli ai le fetuga o le alafatu na Malaesilia. Aua o lele ua liligo pisaga o le siuamouli o le atogauga a le Tuitoga, i le seei o Taitai o le Atunuu. O lea ua atoa i tino le tama, ua atoa foi lio o le masina. O le ala foi lea ou te taia ai le papalooa, ma ou faasega i le papaiolamea. Aua o lea ua laulauitoafa le vaosa i le maugaula. O maugasa i le paia Sautuafafafa, o le Maota i Tiafau nei.

O le Maota fai mai e vevete ai upufai o Malo, a o le Maota o le Faautugatagi, e faamemelo i ai le aoao o le atunuu.

Lau Afioga i le Fofoga Fetalai, o lea ua e samasamasugalu, le lefulefu sinago o le taeao. Ma ua e tapue foi le nuusa ma e faasau i malae le usuina o le faufautu tatala a le tamalooa na i atua. Aua le alofa laveai o Samoa, ma ona tagata i le alofa faasoa mai o le Atua. Ua malo fai o le faiva. O le upu moni, o oe o le muaava e toa i ai le auau i aso faapenei. Ma aua ne i galo la le Tusi, “se a ea le aoga o la outou taualga e tele, ina fafano ia.” Ina faamama ia, o le a le uiga? Ia faia mea uma i le faamaoni, ma ia fusia e le alofa.

A o upu foi e fai i lou itumalo i Fagalooa, “fai mai ou te tu i fao ae laa i malata,” se i apo se ua e faasua ai ni lagona ma ni mafaufauga o lenei itumalo aua lenei Paeaiiga lona XV11, ma lona Tala Faatatau o le Tupe 2021/2022, o lea ua faataoto nei i le Maota.

Ou te muamua ona ou faatulou i le tapuaiga le leoa i le papa le gae a lau Afioga i le Ao Mamalu o le Malo. Lau Afioga Tuiaana Tuimalealiifano Vaaletoa ma lau Masiofo. Ae a le falalesee i le tapuaiga a lau Afioga i le Sui o le Fono a Sui Tofia, lau Afioga Le Mamea Ropati Mualia ma lou faletua. Ma o le mamalu lava lea aua le paia o Aiga ma a latou Tama, o Tama foi ma o latou Aiga. Le usoga ia Tumua ma Pule, Ituau ma Alataua, Aiga i le Tai ma le Vaa o Fonoti. Ae a Aiga o Tupu? Aiga o Nofo, Aiga o Papa Aiga o tafaifa?

Ou te le solisoliniu foi pe ou te toe vailuuluu i le pou o le Maota lenei. O lea ou te faatulou atu ai i lau Afioga i le Palemia, lau Afioga i le Sao Faapito, lau Afioga Fiame Naomi Mataafa. O oe o le Taitai o le Malo. E faatulou atu foi i le Afioga i le sui Palemia, faapea le saofaiga o le mamalu o Minisita o le Kapeneta, tainane le mamalu le vaea o sui Minisita.

Liliu mai i lenei Itu o le Malu, ou te faatulou atu i le susu o le alo o le Malietoa, o le tama tau punefu o tulaniu o atua. O oe o le aloalii o le laau na fausia. Lau susuga Tuilaepa Fatialofa Auelua Galumalemana Dr Aiono Sailele Malielegaoi. E faatulou atu foi i lau Afioga i le sui taitai, tainane sui mamalu uma o le Palemene o Samoa.

Ou te faatulou atu foi i le tapuaiga a lau Afioga i le Faamasino Sili, afioga i alii ma tamaitai o le faamasinoga, faapea le Ofisa o Faamasinoga.

Ou te faatulou atu foi ma le faaaloalo i lenei taeao, i le ee mai o lau Afioga i le Fofoga Fetalai, o le Fono Aoao o Samoa. E ofo alofa foi ma faafeiloai atu i lau susuga i le Failautusi o le Maota ma le mamalu o le Ofisa o le Fono,

malo le faatoatoa, malo le tautai, malo le tautua Malo. O outou lava e aao taumatau i ai le tatou Faigamalo, o outou mama na. Onosai i outou faiva alofilima.

Ou te faatulou atu foi i Ofisa Sili o Matagaluega eseese o le Malo, Faauluuluga o Kamupani, Pisinisi ma Faalapotopotoga Tumaoti. Ua malo tautua atunuu, malo le galulue, malo le onosai. O le fatu atoa o lo tatou Malo o lo o i outou aao.

Ou te faafeiloai atu foi i le paia tofofi o le afaigaluega a le Atua, i so o se Fata Faitaulaga i totonu o lo tatou Atunuu. Se ua faamalo tatalo. E talitonu o lea ua see i manu le fala o le Malo, ona o la outou nonogamanu.

Ou te faatalofa atu foi i le tapuaiga o le Faigamalo a Tutuila ma Manua, aua le Tuitele ma le Tuimania, le falelima i Sisifo ma le falelima i Sasae. Le afio o lau Afioga i le Kovana Sili faapea lau Afioga i le Lutena Kovana. Lau Afioga i le Peresetene o le Senate, aemaise le Fofoga Fetalai o Maota e lua. O le mamalu lava lea aua Sua ma le Vaifanua, Saole ma le Launiunasaelua. O Fofu ma Itulagi ma le Afioga i le Maoputasi, e faapena le mamalu tele i alii o le laaunaamotasi. Faatuiotomutu ma le auvaa o tootoo ma upu ia Manuatele. O ou paia sauoo ia ma mamalu sausaololoa. E mai lava i le Fagaoneone seia paia le siupapa i Agalega e tulalata i falemoa na tauia ai manu o Malo.

Lau Afioga i le Fofoga Fetalai, aveia ia lenei avanoa, ou te faapai atu ai i le tapuaiga a si ou itumalo e pele i lou agaga le Vaa o Fonoti. Ou te manatua saafiafaga a le Tuimania i lona alo tamaitai o le teine o Alofasauepa fai mai, “Sau ina alu ma ia ia e lua, o le maatu mai vai ma le alavatulua.” Na fesili le tamaitai pe momoli i fea. Fai mai se i momoli i lou alii la e seei mai i le lagituaiava seia paia le lagituasefulu. E mafua i se a? Ona o le moni o lona alofa, ma le mauuluga o lana faaeaea. Ou te talitonu o lagona foi ia o la outou sui usufono i lenei taeao.

Ou te tautala ai ma le faaeteete ma le faaaloalo, e faafeiloai atu ai i si ou nuu o Uafato. Le paia aua le afio o aiga aua le aiga sa Fenunuivao ma ona alo tutusa, susu le Togia ma le Aumua, tainane le mamalu ia te oe Leitualasa.

Se ua faamalo le sailimalo, ou te talitonu sa outou fagota i le sao, ae ou faiva i le liulua. Sa outou mataugalu, a o tau faaofi lo tatou sa i le ava galua. A o lea ua musa i Fogaa le Sagalala ina ua tapatini e pei o upu i le aumoega a manaia. Se ua malie le tausuluga a Malietoa na i le maota. O le upu moni, ua malie le loto ua malie le agaga ua malieo le igoaipu o le tapanu a le Tuamasaga. La outou pule lea.

Ona ou oo mai lea i si ou afioaga o Lona. Aua le afio o le aiga Salevalasi ma le gafa, lo la toalua ia Laumea ma le aiga tainane le mamalu i pule e fia.

E faapea foi si ou nuu o Maasina aua le afio o le Valasi alalatai lau fetalaiiga Leao. O le na ulumatua i tofiga, tainane oulua taunatoalua Togia ma Leausa. Ae fililauloa le toaganamua ia te oe Salemuavaa.

E talitonu o lea ua tau mai manu faapolopolo e pei o le fetalaiga i aualuma faalelea. Le faamoemoe o Samoa ona o le alofa laveai o le Atua. O lea ua tumu le utu a le aliiseu, ua mapu foi i tau le piuga na i le faleselau, i la outou faaeaea i lou faatauva. O lau faaaloalo se ua malie le maimoaga na i le laulala, ua malie aimalepapa nenefu faafetai.

E le itiiti le agaga faafetai i si ou nuu o Taelefaga. Aua le afio o Salevalasi tainane le Tuiatua ma le igaga. Ua malieo ua maliemalo. E leitioa tutulu le alo o Tuiaana ma faapea mai, “ua ta ula i lau ula, ua ta pale i lou pale, ua ta titi i lou titi, ua ta sei i lou sei.” O la outou puleto ua avea ai lou faatauva e fai ma fofoga taumolimoli o lo tatou itumalo i upufai o Samoa.

Ia tapuai maia, ou te mafanafana lava ona o a outou tatalo. E le galo foi si ou nuu i Salimu aua le afio o Leulualofaiga ma le matua o Talamaivao, le taauso ma Alosina vaeane le suafa Satiu.

E faaleo foi le agaga faafetai i le afioaga o Musumusu aua le afio o Salevalasi, alalatai lo outou toafia, tainane Taulauniu ma aiga pule. O lea ua malie le loto malie le agaga i la outou faaaloalo ua tototetele. I au faamanuiaga ua sautuafafafa, o lea ua ou sapaia faatuaeleele, faafetai faafetai lava.

E le faagaloina foi si ou nuu i Sauano. E momoli lau faafetai aua le afio o Aiga ma le Aloalii, lau fetalaiga i le Laau na fausia o Atua le Fauono, lau fetalaiga Limutau.

E le faagaloina foi le afioaga o Saletete aua le afio o Sefamatauemaga ma Usoalii, afifio Tama a le Paepae ma Alaalamaota. Ou te talitonu o lea ua ou sapi i la outou tofa maualuga, a o se faautautaga alumamao i lo outou mamalu. Lea ua ou seei ai i le Nofoa o le tatou itumalo. Faafetai mo le amanaia o se faatauva.

Ou te manatu o le a ifo ia i le toega o vai na lulu i le lotoivai o tausala, le na fou i ai le tausiliganuu a manaia, i si ou nuu pele o Samamea. O lea ua e sесеe i fanua le fua o aauloa i le faamoemoe o Samoa, ua soo nei taiao ma ua pupuni foi mulilau ona o lo outou sailimalo. Lo tatou nuu, e itiiti oe i le faafanua o le ta itumalo ae itiiti lava alegeamea. O lea ua e faaea lou itiiti ma lou faatauva. E le o se futu na tafea o le tama lava a le eleele. Faafetai i lo outou alolofa e moni, faafetai i lo outou titi faitama ua tumatie ai lau tama fanau. Faafetai le faaaloalo.

Ou te manatu o le a malaga ia ma Tumuaatasi ma Malolefoua i tai le peua le vii o Tapusalaia, ae logo talalelei le vii o Tupologa aua le aiga Sa Levi o lou itumalo. Lau Susuga i le Toeaina Faatonu, lau Susuga i le Taitaifono o le Komiti a le Au Toeaina lau Susuga Asotai Gu Time ma le faletua ia Savaliga, tainane foi le nofo a faafeagaiga i so o se fatafaitaulaga e fia i totonu o lou itumalo. Faafetai le alolofa, faamalo le onosai. O lea ua ae faiva o le manusina i la outou faatamasoaliiiga, faafetai faanonomanu o lea ua fusi le fau o malo ona o a outou tatalo. E le auaoa le lagi i lo outou fitaituga ua mafua ai ona ou pale.

Lau Afioga i le Fofoga Fetalai, ia e le alulua foi faa-malaga le faaaloalo se leo, e faafetaia ai le sa tulai mai foi i le foe o lenei itumalo le Afioga ia Tialavea o le sa tauaveina le tofi o le ta itumalo i Paeaiga e lua ua mavae, faafetai mo galuega e tele a e taumafai i ai aua se lumanai manuia o le itumalo.

E faamauiina foi le agaga faafetai i tupu ma tamalii o nai ou uso ma si ou tuafafine e toatasi sa o matou tauva i le faiga palota. O le upu e masani ai le atunuu, tatou te taaalo lava a o tatou lava o le auvaa e tasi ia Samoa. Faafetai le faatamalii. Faafetai le faatausala. Ae ou te faaoololomaau atu se lagona ma le loto e maualalo, aumaia la outou lagolago, aumaia la outou faatuatuaga ou te alu ma au, aua se manuia o le ta itumalo.

E fia faaleo foi le agaga faafetai i lau Afioga i le Fofoga Fetalai i lau Komiti, e pei lava ona ou fai atu, so o se mea lava e te faia, ia aiaiu, faamaoni ma faafeao le faapalepale. O manatu ma mafauauga, ua o se meli e momoo i ai manufelelele o le taeao fou. Malo le lotomau i le mea moni, ua a nei? O lea ua tali le Atua i lo outou tautiga, ua mafua ai ona ou seei mai i le Nofoa o le ta itumalo.

E le faaitiitia foi le faafetai tele i o ma aiga i Samoa nei faapea foi atunuu i fafo. O le upu moni, e tumatie le tagata ona o le tapue a lona aiga. O la outou lagolago malosia lea ua taumanuia ai le faamoemoe.

Ona faaii lea o sau faafetai i si ou toalua faapelepele, o lau manamea e toatasi, le afioga ia Fuatino Vanila ma si au fanau. Malo le onosai, faafetai le lototetele, e le faigofie le ogasami sa taualo nei. Ae a? O lea ua talamanuia le faamoemoe ae tala viia ai le Atua. Omai laia ina o e toe fai a tatou pizza o lo o fiafia i ai le Maota, aemaise o Samoa ma le atunuu.

O la le fai Salamo, “Lou agaga e, ia e faamanu atu i le Alii, o mea uma foi o i totonu ia te au, ia faamanuiina lona Suafa Paia.”

Lau Afioga i le Fofoga Fetalai, o lenei taeao i le Tala Faatatau Autu o le Tupe 2021/2022, e fia faamauiina foi le faamalo ma le agaga faafetai o le Vaa o Fonoti i lau Afioga i le Minisita o Tupe, o le Ofisa Sili o Pulega aemaise le Matagaluega o Tupe. E le faigofie le tuufaatasia o lenei galuega, e tali atu ai i manaoga o itumalo e 51 o le tatou atunuu o lo o tapuaia o tatou faiva. Malo faafetai tapena. E tele foi ni vaega taua e fia tuuina atu ai se sao o lenei itumalo aua le lufilufiina o le tamaoaiga o le tatou atunuu.

Ia, ona ou amata mai lea i le Matagaluega o Galuega. Lau Afioga i le Minisita o Galuega, Felauaiga ma Atinae Eseeese o le tatou Malo, ina ua ou maua tala ua tofia lau Afioga Olo e avea ma Minisita o Galuega, e lua lava Olo na tulai mai i lou mafaufau. O le Olo muamua, o le Olo i Papelonua lea e taua e le Tusi Paia ou te le iloa po o maua e Olo. Ae pau lona, o le Olo lea na aea e le fili.

O le Olo lona lua, o le Olo lea ua avea nei ma Minisita. O le Olo e le mafai ona aea e se fili. E mafua i se a? Ona o le Olo o le alofa, o le Olo o le ola, o le Olo e talimanao ia faia manaoga o Fagalua. O lea e tatalo atu ai ma le

agaga faaaloalo lau Afioga i le Minisita, o manaoga o lou itumalo lea o le a fofola atu, e toe fia faaleleia uma auala o lou itumalo. Mai lava i le Mafa seia faaoo i Uafato, toe liliu i le agavale, faaoo i Musumusuu, agai i Falefa ia sopolua Falefa ma le auala i le falelua i Sauano ma Saletete. O lo o i ai se auala i le va o Musumusuu ma Saletete. O lea e tatalo atu ai lau Afioga i le Minisita, e fia faaleleia le soo auala lea, leaga o le upu moni, a solo luga o le mafa, talofa e, e tutu ai lava taavale a Fagaloa se i po ua le saofia mai Apia. O le ala lea, lau Afioga Olo o le alofa, se alofa mai. O le ala lea ma te tatalo atu ai i le auala lea, i le va o Musumusuu ma Sauano, ona a afaina le isi auala a o la e maua le avanoa o le itumalo e fegasoloai ai i le itu lea. O lo o i ai se pine faamauina, o le ala o le taumafai atu e i ai se isi o faletua o le matou itumalo, e le natia, i le taimi o le afa o Eveni, sa faanatinati mai ai i le falemai. O le upu moni na solo se tasi o vaega tele o le auala ma toe foi ai, e taunuu loa i le fale, ae amia loa e le Atua. O le ala lea e faataua ai lau Afioga Olo, se leitioa tofi oe e Fiamē.

Ia, e tatalo atu foi i lau Afioga i le Minisita, o lo o i ai le auala laupapa lea sa faamoemoe e fausia mo le afioaga o Uafato. Ae talitonu lava o lena e i ina le faimeatonu aemaise o lou faimea lelei i lou tulai mai. O le auala laupapa lea i Uafato, ua fai si tele o le afaina. O lea e tatalo atu ai e manaomia le toe faia o se auala fou ina ia siitia i luga ina ia faafaigofie ai le feoai o le afioaga.

Ona ou oo mai lea i taligalu. Lau Afioga i le Fofoga Fetalai, mo le silafia, o le itumalo lenei, tasi lenei vaega o le atunuu e aafia tele i le malosi o le sami. E le gata i le vaitau o mala faalenatura, e aofia ai afa ma matagi malolosi, a o le suiga foi o le tau. Ua matauina le siisii pea o le suasami aemaise o le aafia ai o eleele ma gataifale o si o matou itumalo. E tele tausaga o faaleoina pea a matou talosaga, a o le fiafiaga tele i si ou itumalo, o le tali mai lava o le Malo e fausia auauai taligalu i lea tausaga taitasi, e fua lava i le malosi o le tamaoiga ma le faasoasoaa limalelei o le faigamalo i tausaga e tele. Sa i ai le faamoemoe o le Tausaga Faaletupe lenei 2021/2022 o le a i ai se vaegatupe faaopoopo mo taligalu e tua i ai afioaga aupito i aafia i le gataifale ma ona eleele tulata i le sami i le suiga o le tau.

Peitai, o le vaai o lenei sui usufono, e le o i ai se vaegatupe faapitoa mo taligalu, se i vagana ai le \$250,000 ua tuuina atu i le Matagaluega o Galuega e tapena ai se suesuega o galuega tau taligalu ma uafu mo vaa laiti, mo na o se itumalo e tasi. O lou taofi lau Afioga i le Fofoga Fetalai i lenei galuega, o se fuafuaga e le tataua ona faaalualu maumau ai tupe a le tatou Malo. O le galuega o taligalu faapea uafu laiti, e i ai le talitonuga o se galuega ua i ai le tomā ma le agavaa i totonu o le aufaigaluega o Matagaluega a le Malo, e pei o le LTA, o le Matagaluega o Galuega, Felauaiga ma Atinae Eseeese, faapea le Matagaluega o le Punaoa Faalenatura ma le Siosiomaga.

O lau tatalo i le Minisita o Tupe, taofi lea suesuega ae faasaoina lea seleni faaopoopo e i ai ma nisi vaega e fausia ai taligalu, o nai itumalo ia e aupito

aafia i le malosi o le sami ma le suiga o le tau. E silafia foi, pau lava lenei o le itumalo e fai i ai le upu, “E lumafale i le moana ae tuafale i le papa”. O le mea lea lau Afioga i le Minisita o Tupe, ou te talitonu foi na ona eseese lava o ta itumalo ona o tulaga faale-faapalota, ae ou te talitonu lava o lea e te afio mai lau Afioga i le Minisita, ia o oe foi o le Too o le Fua. Se i e silasila ane ma lou alofa aemaise o lou agalelei tele i lo tatou itumalo.

Lau Afioga i le Minisita, masalo foi e tele nisi o matou afioaga o le matou itumalo ua tele ina faaleagaina afioaga i taligalu e pei o Taelefaga, o le afioaga i Maasina, o le afioaga i Lona, faapea foi Samamea ma le falelua o Sauano ma Saletele ona o le malolosi o galu.

Ona ou oo mai lea i le suavai. E talitonu o lo o i ai se fuafuaga a si ou itumalo mo le galulue faatasi ai ma le faalapopotoga o le suavai faapea le tuuina atu i maota ma laoa. E le toe tau faailoaina le faatauaina o lenei punaoa. Ma o le agaga o lenei itumalo, ia faaauuina pea le lelei o le auaunaga tau suavai mo aiga uma. A ou vaavaai atu i le Tala o le Tupe mo le Pulega o le Suavai, o le a tele le faaitiitia o lana paketi mai le \$15 miliona i le \$11 miliona. O lona uiga e \$4 miliona ua le toe maua mo ia auaunaga moomia. E tatalo atu i lau Afioga i le Minisita, se i toe silasila ane i lea vaegatupe taua tele o lo o faamoemoe i ai le toatele o le tatou atunuu mo le faaooina atu o le auaunaga o le suavai, aua le soifua o aso uma. Afai e faaauu pea ona faaitiitia vaegatupe mo galuega ma atinae tau suavai, e i ai le talitonuga e ono aafia ma tulai mai ai ni faaletonu.

Muamua, faapafala o polokalame faaauu o le tufatufaina atu o suavai mama ma le saogalemu i aiga uma o Samoa. O le a toe siitia maua luga le pili o le suavai e totogi i masina taitasi ina ia gafataulimaina ai e le Pulega o le Suavai ona faaauu ana auaunaga taua mo le atunuu. Tolu, ma o le a leai foi se fesoasoani mo aiga ma afioaga o le a siitia e nonofo ma faamautu i eleele maua luga ona o le siitia o le suatai ma le sami ona o le suiga o le tau.

Ona ou oo mai lea lau Afioga i le Fofoga Fetalai i le Pulega o le Malosiaga tau Eletise. Se ua faamalo le galulue i le ao ma le po, timu po o le la, e talitonu e le faatafatafa la outou auaunaga. A o le tatalo a Fagaloa, ua matua manaomia nisi moli faaopopo i le auala se i faamalamalama ai le vaa e tasi ia Samoa. Aua o le mea e lelei i Apia e tatau foi ona matua lelei i le Vaa o Fonoti.

Ona ou oo mai lea i le Matagaluega o Faatoaga ma Faigafaiva. Lau Afioga i le Minisita o Faatoaga ma Faigafaiva, e silafia o lou itumalo e faamoemoe tele lona tamaoiga i atinae tau faatoaga e pei o le ava Samoa lea e fiafia ai le toatele, fai mai o le susu le mea. O le tele o isi atinae o lo o faatinoina i lou itumalo e pei o galuega o meataulima. Ia, e momoli le agaga faafetai. O lea ua i ai le faamoemoe e faaauuina pea le polokalame o le faaaliga o fua o faaeleleaga i le tele o tausaga e faatinoina e le faigamalo ua tuanai atu.

FOFOGA FETALAI: Toe lua minute o le sui usufono.

Afioga MAUU SIAOSI PUEPUEMAI: O se fuafuaga lelei tele, ma ou te tatalo ia maua le avanoa e avatu ai nai faaaliga faapea i si ou itumalo. Lau Afioga i le Fofoga Fetalai, talu ai o lea ua...

Susuga Hon Tuilaepa Dr. Sailele Malielegaoi: Lau Afioga i le Fofoga Fetalai, talu ai...

FOFOGA FETALAI: Se i fai sina au mapu se i saunoa mai le Taitai o le Itu Agai.

Susuga Hon Tuilaepa Fatialofa Auelua Sailele Malielegaoi: O le saunoaga lea e fai nei o le Saunoaga o le Maiden Speech Faa-Taupou. O le a sou finagalo, *Ae toe faaopoopo ni nai minute o le saunoaga matagofie i le faafogafoga a le Maota.*

Faaluaaina e le sui usufono mo Anoamaa Nu.2.

FOFOGA FETALAI: Faafetai, o lea ua maua atu lou finagalo, o lea foi ua maua. E talitonu foi o lea ua leai lava se tulimanu e le i oo i ai le saunoaga a le sui usufono mamalu, e le gata o lona itumalo atoa a o le atunuu. O le mea lea ia, e talitonu lava ua, o lo o mulimulitaia lava e le tatou sui usufono mamalu, ma faaauau mai lau saunoaga.

Afioga MAUU SIAOSI PUEPUEMAI: Faafetai i lau Afioga i le Fofoga Fetalai. Ia ua maua atu o lea foi ua toe faaopoopo le isi afa itula, faafetai, e faaauau ai manaoga o lenei itumalo.

Ia, ona ou oo mai lea i le faatinoaina o nisi o auaunaga taua ma oloa auina atu i fafo o faatoaga i le tatou fale tele lea i Aele i Nuu e faamama ma teuina ai oloa mo le siakiina o manu faalafua. Sa faalauiloa foi i le 5 tausaga na tea nei le fale fou o le Malo i Aukilani o lo o galulue ai le Matagaluega ma le Faalapotopotoga a le STEC, mo oloa a Samoa e auina atu i fafo. Lau Afioga i le Minisita o le fesili; o a nisi auaunaga e ese mai vaega e pei ona taua i luga i le galuega, o lo o faia nei i Nuu ma le fale fou i Aukilani o le a faatino ai lenei pulega fou. Ia, o le a foi le umi e tapena ma faatuina aloaia ai lenei ofisa, e talitonu e le o se galuega e faigofie. E i ai le manatu, o lo o i ai lava le Matagaluega o Pisinisi, Alamanuia ma Leipa po o le MCIL ma le Matagaluega o Faatoaga ma Faigafaiva ma a latou afaigaluega.

Ona oo mai lea i le Minisita mo le Soifua Maloloina. Lau Afioga i le Minisita, tasi lenei itumalo e leai se falemai faa-itumalo. E mamao Fagaloa ma Lufilufi, E tele nisi o lou itumalo, e tele le afaina o le latou soifua ona o le tilitili alualu mai i Lufilufi. Ae i ai le manatu, a faatuina se falemai faa-

itumalo i lo matou itumalo, ou te talitonu o le a maua se laveai i le mamalu o lo matou itumalo.

Ia, talu ai ona o lea ua faapuupuu lo matou taimi, ona ou see mai lea i le Matagaluega o Aoga. Lau Afioga i le Minisita o Aoga, Taaloga ma Aganuu, o le aotauina o fanau a Samoa, o se tasi lea o manulauti e faatauaina tele e lou nei sui usufono. Ua lelei tapena faleaoga mo alo ma fanau a si ou itumalo, ae paga lea, o lo o moomia pea le faaopoopoina o nisi o faiaoga ona e le lava faiaoga o lo o i ai i le taimi nei. O le mea lea, ia se i e silasila ane ma lou alofa tele i aoga a lenei foi itumalo. Ma le faaaloalo.

I le matau atu i le Tala o le Tupe o lo o i ai sina popole, ona o lea ua pau po o ua faaitiitia nei le fesoasoani a le Malo mai le \$18 miliona sa i ai i le tausaga faaletupe 2020/2021 i le \$17.7 miliona i le tausaga faaletupe o lo o talanoaina nei. A fua foi i le faitau aofai o le atunuu i suesuega sa faatino ia Oketopa ma le tausaga na tea nei i le 2020, ua siitia le faitauaofai o le atunuu mai le 197,000 tagata i le 215,000 i totonu o le 3 tausaga mai le 2017 i le 2020. O lona uiga, o lo o faatupulaia pea le atunuu ma e tataua ona siitia le fesoasoani mo aoga, a o lea e matau atu o lea ua faaitiitia. Ma o se lagona vaivai lea o le sui usufono o lenei itumalo e matau ai ma le alofa i fanau a le atunuu.

Faafetai o lea ua i ai le faamoemoe o le Malo lau Afioga i le Fofoga Fetalai e siitia le fesoasoani mo polokalame tau aoaoga ma tulaga tau taaloga. E momoli le agaga faafetai tele. I lau sailiiliga i le Tala o le Tupe, ou te manatu o lea ua faaitiitia nei mai le \$450 miliona i le \$300 miliona le vaegatupe ua tuuina atu mo le fausiaina... \$450,000 i le \$300,000 le vaegatupe ua tuuina atu mo le fausiaina o malae taalo a aoga ma itumalo. O nei galuega e le taugofie, ae o lea ua pau maualalo lenei fesoasoani. O lona uiga, e tele nai itumalo o le a le tali o latou manao. Ae taoto atu i lau Afioga i le Minisita o Aoga, o oe lava o le faasoa mea lelei.

Ia, ona ou see mai lea i le Matagaluega o Punaoa Faalenatura ma le Siosiomaga, lau Afioga i le Tamaitai Palemia o lo o nafa nei ma le Matagaluega. Faamalo mo galuega faatino ma tiute tauave aua le Matagaluega e le faigofie. O nai mataupu lava e fia malamalama ai lenei itumalo, aemaise o nai fautuaga i lau Afioga. E matau pea ma le faanoanoa i konekarate ao lapisi tulou. Le paia o le Maota, atonu o se matafaioi faatasi lea a le Matagaluega o le Soifua Maloloina ma le Matagaluega o Leipa po o le MCIL. Faamolemole se i mataitu ane nai tagata faigaluega ia o lo o aoina le lapisi, tulou, mo le puipuiga o le latou soifua maloloina, le faatinoga o le latou galuega, nisi nei o konekarate a tagata faigaluega. Ia e leai ni puipuiga lautele o nai tagata aua le aoina o le otaota. E fesiligia foi po o le a se tulaga o i ai le fesoasoani a tatou paaga i fafo, aemaise lava i le poloketi lea sa faamatuu mai ai vaegatupe e fesoasoani ai i aafiaga o le suiga o le tau. Po o toe i ai nisi fesoasoani e fesoasoani mai ai i lou itumalo, tasi lenei itumalo e

sili ona aafia i le suiga o le tau. Ae momoli le agaga faafetai tele i nisi o fuafuaga o lea ua faataoto mai.

Lau Afioga i le Fofoga Fetalai, ia ua iu manaoga o le Vaa o Fonoti, ae momoli le agaga faafetai tele i lou seei mai i le tofi, aua le faatautaia o le Maota Fono i lenei foi Paeaiga. A outou Afioga i Minisita ma sui usufono uma o itumalo ua tulai mai mo le faafoeina o le sa o Samoa, o le tatalo, faamanuia le Atua i outou faiva.

Lau Afioga i le Palemia lau Afioga i le Sao Faapito, ia limataitaiina lau tofa i le alofa, e aiaiu ma faamaoni i tulaga uma, faafeao le faapalepale i mea e tiga ai. Ia o lagona na, o ula na, a ula ai e filemu Samoa. A ula ai, e fealofani Samoa. A ula ai, e manuia Samoa ma ona tagata.

Lau Afioga i le Taitai o le HRPP lau Afioga Tuilaepa, ia alofa le Atua pulepuletele o lo o i ai le sosia o le tamaoaiga o mafaufauga, sasaa ane, sasaa ifo ina ia utupupuina fulu o le segaula aua le feagai ai ma tiute ma faiva.

Lau Afioga i le Fofoga Fetalai e auala atu i le Minisita o Tupe, ia tautuana le sa o le tatou atunuu. Aua le naunau i le i'a ae maumau ai le uega. Lo tatou tamaoaiga, e laitiiti ma maaleale, e leai foi ni a tatou auro, e leai foi ni a tatou ario tatou te tua i ai. O tatou o taitai o le atunuu, o tatou o lo o tuu mai i ai le faatuatuaga ma le faamoemoega aua le faatonufofolauiina o le sa o Samoa, aemaise o lona tamaoaiga ina ia manuia a taeao.

O upu e masani ai, “E leai lava se faiva e asa ma se maumau.” Afai foi ua see faatuagalu i peau o le taipapau se leo i le faafofoga a le Maota. O le tatalo a lenei sui usufono, aua ne i afea i talimalae, ina ne i le ulufia le Maota ae faasee i tuafaleina, ina ia toe tupu ma ola se vaivaiga ua momoli atu.

Lau Afioga i le Fofoga Fetalai, faafetai tele mo lou avanoa. Manuia le Maota, manuia le tapuaiga a Samoa ae ola le leo faatauvaa a le sui usufono mo le Vaa e tasi ia Samoa, faafetai.

Na faaalua le agaga fiafia o le Maota i le patipati o latou aao i le maea ai o le Saunoaga Faa-Taupou a le sui usufono mo Vaa o Fonoti.

FOFOGA FETALAI: Faamalo faafetai saunoa, faafetai foi tanoa i lau Afioga i le sui usufono mamalu o le Vaa o Fonoti. O lea lava ua faalogo vaotutui le paia o le Maota aemaise le faafofogaaga a Samoa aemaise o si ou itumalo, i lau faatamasoalii aua lenei aso ma lo tatou faamoemoe o le tatou Fono. O le mea lea, malo faafetai. O lea lava ua atagia le tele lava o lou lagolagoina o mataupu o le tatou Tala o le tupe, aemaise foi o talosaga aua lo tatou itumalo. O le mea lea, ia malo faafetai faafogafoga mai foi le itumalo. O lea lava ua oooo lava saunoaga, lau faatofalaiga aua le manuia lautele o lo tatou itumalo. O le mea lea faafetai, malo saunoa, faafetai tofa, faafetai foi le agaga aua le tautuaina o le itumalo ma le atunuu. Malo faafetai.

Ia o lea e matau atu, o lea lava leaga o lea ua ou vaai atu ua tulalata i le tatou malologa, ia ou te talitonu foi...o lea ou te vaai atu o lea e taufoufou mai le sa o lea foi itu. E talitonu o lea o le a tatou malolo mo lenei taimi ona ua lalata lo tatou taimi malolo, ona faatulai mai lea o le sui mamalu mo le faaauauina o le saunoaga.

O le mea lea ou te faasilasila atu ua faataatiaese nei Galuega a le Fono Aoao mo lana malologa masani.

Na faataatiaese Galuega a le Fono Aoao mo lana malologa masani i le itula e 10:55 i le taeao ma toe faaauau i le itula e 11:30 i le taeao.

Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe 2021/2022.

FOFOGA FETALAI: E faasilasila atu, ua toe amatalia nei Tualumaga a le Fono Aoao Faitulafono.

E sauni e fai le tatou malologa, ua fou mai le sa o le igoa a matua, le fetalaiga ia Ale Vena, o le sui mamalu mo Faleata Numera 4. E tasi lenei sui usufono tuai o lo tatou Palemene. E talitonu foi o le a le toe taupou, ae o le a malaga sao lava aua manaoga o lona itumalo i Faigamalo.

Lau Afioga i le sui usufono mamalu...

Tofa ALE VENA ALE (Faleata 4): Ou te momoli atu le agaga faafetai i lau Afioga i le Fofoga Fetalai i lenei taeao ma ou ofo alofa atu, e tusa ai ma le avanoa ua tauaaoina mai e folasia ai se manatu o lenei itumalo i le Fonousu a lo tatou atunuu, ae a le Tala o le tupe ua i lumamea nei i le Fono.

Ua taia e susue o fuefuemasina ua atoa paia ma mamalu o le taeao ma le aso. Tulouna le malae i Tiafau, ma le Maota o le Palemene o le faautugatagi o le atunuu. E lipoi ai upufai o Malo, e lufilufi limalelei ai tonu fai a le atunuu aua se manuia o Samoa mo nei ma a taeao.

Tulouna ia le afio o lau Afioga i le Fofoga Fetalai, afifio sui mamalu o le Palemene, afio lau Afioga i le Palemia faapea foi Minisita o lau Kapeneta. Afifio afioga i Minisita lagolago. E faapea foi lenei itu, i le afio atu o le Itu Agai i le taitai, e faapea foi sui usufono mamalu uma o le Palemene, o sui filifilia o le Atunuu. Na filitagaga i ai itumalo latou te omai ina ia mafai ona soalaupule mataupu uma, e manuia ai Samoa mo le lumanai.

Ou te faatulou atu foi i le paia o le tapuaiga, i le afio o lau Afioga i le Ao mamalu o lo tatou Malo. Le afioga i le Tuiaana, le Afioga ia Tuimalealiifano Sualauvi Vaaletoa II ma le masiofo. Lau Afioga i le sui o le Fono o Sui Tofia ma le faletua.

Afio lau Afioga i le Faamasino Sili, faapea foi alii ma tamaitai o le Faamasinoga o Soligatulafono. Afio lau Afioga i le Peresetene faapea foi alii ma tamaitai o le Faamasinoga o Fanua ma Suafa.

Le paia o le tapuaiga a lo tatou Atunuu, aua Aiga o tupu ma Aiga o Nofo, Aiga o Ee, Aiga o Aapa ma Aiga na Tafaiifa. E a le usoga a Tumua ma Pule, Ituau aua oe Faleata ma lou fale na ato i ata, o pou o la outou toafa (4). Ituau malosi le Alataua faapea foi le vaa o Fonoti, Faleupolu o tofiga ma tulatoa o aiga.

E faatulou atu foi i le paia o Faigamalo a Tutuila ma Manua, aua le afio o le Kovana sili faapea foi le Lutena Kovana. Afio le Peresetene faapea foi le Maota o sui, faamasino sili ma le Malo tele o Amerika Samoa. O le paia lava lea aua le afio o Sua ma le Vaifanua, Fofu ma Itulagi, Saole ma Saleaamua ma le Launiunasa lua. Faatui ma le auvaa o tootoo. E faapea foi le laaunaamotasi, le paia i le Manuatele.

E le faagaloina ai le tapuaiga i auauna a le Atua o feoi o le Talalelei. O lo o faanonomanu i le Atua, ma tapuaia o tatou faiva ma o latou tatalo, ina ia manuia le Palemene o Samoa ma a na faiga tulafono. Ina ia malu ai le Atunuu ma maua ai se manuia o Samoa mo le lumanai.

O ou paia na Samoa, o paia ua uma ona aisa, o paia ua uma ona tafaitoa, o paia ua uma ona tafaitau, tafaitoto, tafaimalo. A o paia foi ua uma ona tafai faafaleupolu, tulou tulouna lava.

Lau Afioga i le Fofoga Fetalai, ou te ofo faatalofa atu i le paia o le afifio mai o Ofisa Sili o Pulega o Matagaluega ma Faalapotopotoga Tumaoti o lo tatou Malo. O lo o tautuaina le Atunuu i galuega a lo tatou Malo. O lo o fitaituga i le ao ma le po, e tautuaina le Malo, le Palemia ma Minisita o le Kapeneta. Aua o i tatou lea e i luga i i, e na o le fai lava o le faatonuga, o latou ia e tua i ai, e faamoemoe i ai. E le gata i le galuega fai, a o le fautuaga. O Ofisa Sili o Pulega o Matagaluega, e fesoasoani i le Palemia, ma Minisita o le Kapeneta, e faapena tulaga e lelei ai tulaga i le faiga o galuega a lo tatou Malo.

Lau Afioga i le Fofoga Fetalai, ae ou te le i oooo atu e folasia se manatu i le Tala o le tupe. E ui lava ina le toe manao e fia oo i ai se tautalaga i futia ua sola. Ae i ai lava le lagona i le sui usufono mo Faleata Nu 4, e aoga mea e tutupu mo le mea sili.

Lau Afioga i le Fofoga Fetalai, le paia e o le Palemene ma Taitai o Samoa. Ua tatou i ai i lenei taeao, tautuana ma tatou lo tatou Faavae. E manaomia i le vaai atu i se toe teuteuga o lo tatou Faavae. Ina ia atagia manino ai matafaioi a le Tafatolu, ina ia aua aua lava, ne i toe tulai mai i le tulaga ogaoga na tatou i ai nei, i fita ma faigata. O le fautuaga lena a le sui usufono mo Faleata Nu 4, e taua tele.

Lau Afioga i le Palemia, Minisita o le Kapeneta, ua tatou vaai atu i taimi nei i le lalolagi i le faamai o le Koviti-19, ua matautia le pepesi o le faamai. E pei e foliga mai ua tausolomua i saienitisi le fau o faamai. Ua matua aafia

o tatou tagata i Niu Sila, aemaise o tagata Samoa i faalapotopotoga. O lea foi ua maua mai i le taeao nei, ua tasi le tagata ua maua i Amerika Samoa, ua latalata mai lava.

Lau Afioga i le Palemia ma le Kapeneta ma lo tatou Malo, ia silasila totoa, i le puipuiga o lo tatou Atunuu, ina ia aua aua aua lava ne i oo mai le faamai lenei i totonu o lo tatou Atunuu. O lea foi ua sau le isi faamai fou lea o le Delta, ua matua fefe ai, aua a pisia loa Apia, ua oo atu loa i Faleata. O Faleata le isi itumalo aupito sili ona tele. Ou te le manao e mai se isi o lou itumalo. Pe oo mai le faamai i inei, o le fautuaga i lau Afioga i le Palemia, le Kapeneta ma lo tatou Malo, aua aua lava nei tatalaina lo tatou boarder. O le puipuiga malu lena, o le fautuaga lena, o le toatele o tatou tagata, o lo o mananao mai e fia Malaga mai. O la latou te silafia le agaga e ala ai ona taofiofi e le Faigamalo ma tatou, ina ne i mea ane ua tulai mai faigata e pei ona i ai isi Atunuu o le lalolagi.

Lau Afioga i le Minisita o Tupe, ua tau galo atu lava le faasalalauga o le vaega a outou lea na fai tai miliona, o le lauga mai...pe ua fia ea lauga a outou lea na fai. E pei ua ou manatu e toe tilotilo i ai.

Se i ou fesili atu lava i le Minisita o tupe, o lea ou te vaai atu i le Tala o le tupe, e le \$1 miliona lea, ae tai \$200,000 lea e faamatuu atu i itumalo. A o le faiga foi lea ou te vaai atu e fai ai, e talosaga mai itumalo, pe fai faapoloketi. E le o le mea lena o lea na faasalalau nei e outou i campaign ia sa fai nei, ma a outou roadshow lea sa fai nei. O le a tufa a tatou miliona. Ou te iloa e tasi lena mea o lea na matua seetia uma ai tagata uma ma palota uma i sui uma ia o le FAST, o tai miliona nei. Ae ui i lea, taoto atu pea i fuafuaga tataua a lau Afioga i le Minisita o Tupe ma le Faigamalo ua tulai mai.

Ona ou oo mai lea i le Minisita o Galuega, lau Afioga Olo. O mea ia o smart meters, se i e toe silasila ane lava i smart meters. A faapea e pe lau cash power, e alu lava le...a oo la i le taimi na e toe top up ai, ua sauga, o la ua aveese atoa lava le taimi lea na pe ai, e foliga mai o la e pe le cash power a o la e alu lava le pili. Ae ui o lea, silasila i ai lau Afioga i le Minisita o Galuega. E manu o ou i ai i i, i le Minisita o Galuega. Lau Afioga i le Minisita, o manaoga ia o lou itumalo. E toe pau lava ia o auala ia e totoe. O auala ia, o auala taloto i totonu. O i le afioaga i Saina, a e silasila i ai i le auala la e i ai ua matua leai lava ma se auala, ua leai se ta o i ai, lau afioga.

O auala galue e agai i ai lou itumalo e galulue ai ia latou faatoaga, e faapea foi auala galue i le afioaga i Puipaa e tau i Toamua. Ua maea le auala i le pito i o i Puipaa, ma i i le pito mai i inei i Toamua, ae toe o auala i totonu, i le pitonuu o Leitulua i Satunumafono ma le Gafaatoe. Ia e tolu (3) auala na e i ina i totonu i ina, e agai ai o matou tagata e galulue ai ma faatino ai a latou faatoaga. E le o toe i ai foi ni fanua tetele o i ai, ae aoga i atinae o fua o fualaaui aina.

Ua ou manatu o le a ou le toe oo i ai i le tulaga o le faagasologa o taualaumaga o le tatou Fono aemaise le Tala o le tupe. O le mea foi lea e tau leai ni manatu e avatu tele i le Tala o le tupe, aua ua le faatulagaina le faagasologa o le tatou tala o le tupe i faiga masani ma faiga sa sau ai faiga faa-Palemene. E folasia le Tala o le tupe ona ave lea i le Komiti o Tupe,

FOFOGA FETALAI: Ou te fautuaina le sui mamalu, o lea ua uma ona fai le faaiuga i le tulaga lea.

Tofa ALE VENA ALE: Faafetai i lau afioga, o lea faatoa matou maua, a fai o lena, e tagaloatusi lava le Faigamalo. O le tulaga foi o lenei taeao, ma le matou tulai atu. E avea foi lenei avanoa e momoli atu le faamalo i lau Afioga i le Palemia, Minisita o le Kapeneta, Minisita Lagolago ma le Vaega Faaupufai o le Faatuatua i le Atua Samoa ua Tasi. Ua malo lava le tulaga sa o tatou alo atu nei i ai i le faiga palota, malo tau, malo toa.

O lena ua outou pale, ua outou ula. Ia ula seluselu lelei le ula. Ina ne i e ula futifuti e tua patatua le mea lena o le ulafutifuti. O lea ua vaai atu ua amata ona ula futifuti, alolofa i le afaigaluega a lo tatou Malo. E pei lava ona ou fai atu o i latou ia o lea e tua i ai, lau Afioga i le Palemia ma Minisita o le Kapeneta. O lea foi ua matauina ua le toe i ai se process i faiga tofiga a le Malo. E pei o le a pule lava le Faigamalo e tofi mai lea mea ma lea mea, e aunoa ma le faasalalauina o avanoa. Ae ui i lea, e pei lava ona ou fai atu, e tau lava ina faaleo atu pea. A o na e i ai le tofa ma le faautautaga i ina. E tagaloatusi lava le Malo ua tulai mai i lenei taimi. E na ona matou omai e faufautua atu, ma o matou omai e lagolago atu, ae o na e i ina le faautautaga oo.

Lau Afioga i le Palemia...

Susuga Hon Tuilaepa Fatialofa Auelua Sailele Malielegaoi: Lau Afioga i le mea e fia faasao.

FOFOGA FETALAI: E i ai se mataupu lau afioga..

Susuga Hon Tuilaepa Fatialofa Auelua Sailele Malielegaoi: O le mea e faasao i le saunoaga a le sui usufono. E faapefea ona fai le mea faapena, a o lea na saunoa le afioga i le Palemia ia fai le amiotonu.

FOFOGA FETALAI: Ou te fautuaina foi le sui mamalu, tulaga maaleale faapea ma tulaga, leaga o lea ua e saunoa manino i le process ma le faatinoina. Ua outou silafia foi le Maota, e i ai lava mau e tuuina mai pe a ua i ai ni mea ua e silafia i le sui mamalu. Ia o tatou liolio foi ma o tatou manatu, o tatou o taitai ia fai pea le amiotonu. E so o se mea lava e laga e sui mamalu, e tataua lava ona i ai ni mau e tuuina mai i totonu o le Palemene.

O le mea lea, o lena e manaia, faaauau le saunoaga o lena ua e see ese. Ae aua e te faalogo i le mea la ua fesili atu ai le Taitai.

Faaauau le saunoaga.

Tofa ALE VENA ALE: Lau Afioga i le Fofoga Fetalai..

Susuga Hon Tuilaepa Fatilaofa Auelua Sailele Malielegaoi: Lau Afioga i le Fofoga Fetalai, o le mea lea na ou tulai ai, e fesili i le sui usufono. O lea na saunoa Fiamē, o lea sa fai le amiotonu. E le faapea la o se isi tulaga, ae e le afaina ai le fesili, leaga o lea e eseese mea lea e saunoa i ai le sui usufono.

FOFOGA FETALAI: O lea ua maua le finagalo o le afioga i le Taitai o le Itu Agai. E i ai le taimi e saunoa i ai le Faigamalo, ma le Palemia ona faamalamalama lea o si vaiiliu lea o lau faafesili lea ua tulai mai.

Se i tulai mai lau Afioga i le Palemia.

Afioga Hon Fiamē Naomi Mataafa: Lau Afioga i le Fofoga Fetalai, o lea ou te tulai atu o le mataupu e fia faamalamalama, i le tootoo o lo o saunoa. E sao lelei le saunoaga a le Taitai o le Itu Agai, e faia le amiotonu e faasao ai le saunoaga a le sui usufono o lo o saunoa.

Tofa ALE VENA ALE: Ou te faamalulu atu foi i le afioga i le Palemia.

FOFOGA FETALAI: Se i onosai mai le sui mamalu se i tulai mai le Minisita o Galuega.

Hon Olo Fiti Afoa Vaai (Matagaluega o Galuega, Felauaiga ma Atinae Eseese): Faafetai i lau Afioga i le Fofoga Fetalai, a matau lou sui usufono i tulaga sa i ai le la itu a o tulai mai i le foe. O le tele lava o mea e le o i ni process, a o le process lea e pei e tau tulitulimatai mai. E manatua foi, e taunuu i le process, ae i ai aiaiga i totonu o mea. E pei o le mea lea o lea ou te tau maua a tua, po o le a le mea ua tulai mai ai ni faaiuga i i, i le vaega lea sa i ai. Se o la lava e i lalo o latou konekarate mea e...a ua solia lava, ia o tulaga na e oo i ai. Ma le faaaloalo.

FOFOGA FETALAI: Faafetai o lea ua maua le tulaga, e talitonu foi, o lea ua faafogafoga le sui mamalu, ia see ese ma le na vaega ae faaauau manaoga o lou itumalo.

Tofa ALE VENA ALE: Ou te usitai tele i le faatonuga a lou Afioga. A fai foi o le a se faafogafoga o le Maota, faapea foi le Malo ua tulai mai i le foe. E leai e le motu i tua le taofi o Faleata. E tonu lava i ina, a fai o la e amiotonu, ia o lena, e tau lava ina faaleo atu. O le taimi lenai, i le tulai mai a la outou

Faigamalo, o lena ua i ina ia te outou tulaga uma e faafoe ai le Malo. E na ona matou tuualalo atu, a fai lava o lena tou te silafia o lena e sao, ia pe sese foi. Ia tatou alu sese ai pea.

Lau Afioga i le Fofoga Fetalai, ou te manatu ua lava ia lea. E tele mea ou te fia tautala i ai i le Tala o le tupe, aua e leai lava se uiga e aumaia ai, avatu. O lea foi ua uma ona e saunoa i le tulaga foi lele, e le toe fiaoo i ai se faamatalaga.

Lau Afioga i le Fofoga Fetalai, o tulaga uma e pei ona i ai le Tala o le tupe, ua talia e lenei itumalo.

Ae ou te le i faamaeaina le tautalaga a lenei vaega i lou tulai atu, ou te avea ia lenei avanoa, e momoli atu ai le agaga faafetai i lou itumalo o Faleata Nu 4. I le afifio o Ale ma Ulu ma o la aiga ma le Gafaatoe ma le Itulua o Satunumafono, lau tofa le Vaaulu, falelima i ai aiga e fa o Faleata, e valu ia te oe pou o le fale Malietoa, aua le tatou fale Tuamasaga. E faafetai foi i le afioaga o Saina, le alo o le Tuitoga. E faapea foi Lauaki ma le Motuopuaa ma le Folasasailaua. Aemaise i latou uma lava o lo o afifio ma papaaao i fanua umiasaoloto o lo o aofia i totonu o le matou itumalo faapalota o Faleata Nu 4, ou te momoli atu le agaga faafetai.

E tusa ai ma la outou faiga filifiliga, ua outou tusiaao ia te au e avea ma outou tofi faipule. Ua 31 nei tausaga o ou taumafai pea i le tofi faipule o lo tatou itumalo. E faafetai foi sa outou faaeaea ia te au i le palota laititi i le 2010 sa ou tulai mai ai. A o lenei ua faaeaina au i la outou faiga filifiliga i le faiga palota ua tuanai atu nei, ou te faafetai tele atu i la outou faaeaea. Faafetai i lo outou amanaia i lou nofonofu atu ma tautua lo tatou nuu ma lo tatou itumalo.

E faafetai atu i lo tatou aiga sa Ale, i le faamaopoopoga o le tatou palota. E faafetai ia te oe Satunumafono, Gofotoe ma lo tatou nuu. E faafetai i le tofa i le igoa matua ia Ulu, ma i latou foi o e na o matou tauva i le faiga palota. Ua tali faaaliali lo tatou itumalo, atonu o le finagalo foi lea o le Atua mo lenei taimi ua filifilia ai au e avea ma outou tofi faipule.

E faafetai i le tapuaiga a lo tatou nuu, aiga, uo aemaise o lo tatou nuu o lo o afifio ma alala mai fafo. O lo outou aitaumalele ma tautua mai i aiga ma le nuu ma le itumalo. E faafetai atu i lo outou lagolago mai i so o se auala. Aemaise o i latou uma, o e na ofoalofa mai i le taumafaiga o le faigata o le faiga palota ua tuanai atu nei.

Lou itumalo pele Faleata Nu.4, lafo maia la outou faatuatuaga, o le a ou tauaveina lou tofi faipule i le taualoa ma le mamalu, o le a ou tauaveina i le alofa ma le faamaoni a o avea ai au o se sui usufono o lenei Palemene. O a uma mea o le a finauina e upufai o Malo, o le mea e i ai le talitonuga o lo outou sui usufono e tataua ona ave i ai le lagolago o lena. O fea le mea ou te manatu e le tataua ona faia, e faapena.

Le tatou itumalo, faafetai tele. Faamanuia le Atua i le paia i le nofo a faafeagaiga o lo o faafaletulua ma falelemalu i totonu o le tatou itumalo. Ou

te faafetai tele atu mai le taele o lou agaga. Sa le faapito manu ia Tasi i la outou tatalo aua lo tatou alo atu mo le faiga palota.

I lenei taeao, ia alofa mai le Atua pulepuletetele, faamanuia i le tatou itumalo, faamanuia ia Samoa ma lona Malo tau atiae, ia maua se manatu o la outou tofi faipule aua upufai o le tatou Malo. Ia umi lou ola e tautuaina ai lo tatou itumalo i so o se auala, a ia faasilisili le tatou tautuaina o le Atua ma lona finagalo. Soifua.

Susuga Hon Laauli Leuatea Polataivao Fosi (Minisita mo Faatoaga ma Faigafaiva): Lau Afioga i le Fofoga Fetalai, e fia maua lava se avanoa faamolemole.

FOFOGA FETALAI: Tulai mai lau Afioga i le Minisita mo Faatoaga ma Faigafaiva.

Susuga Hon Laauli Leuatea Polataivao Fosi: Faafetai. Sa leai lava se agaga e faalavelave a o folau le vaatele i le saunoaga momoli po o le lauga faataupou a le Igoamatua. A o nai mea laiti lava na ou manatu ou te tulai atu pea e faamalamalama ma faapulapula, o le saunoaga lea, le upu lea ua lafo sa folafola e tufa le tai \$1 miliona ina ia faasaoina le upu lea. Ona e le i ai se taimi na fai ai le upu lea i fafo i tatou roadshow leaga o la e faalogologo le atunuu ma faapea mai, o le upu lea na seetia i ai Samoa.

Lau Afioga i le Fofoga Fetalai, ou te manatu e faamanino le vala lea, o le a faaagaaga le tai \$1 miliona mo atinae a itumalo taitasi. O se taimi ona saunoa lea o le Afioga i le Minisita o Tupe e faamalamalama le vala lea, ae na pau lava lea o le mea na ou tulai atu ai. Ae ou te le i manao e toia le va leaga o lea sa saunoa le Afioga ia Ale. O le upu foi lea o le maua ula futifuti, o le faasolo lea na aumai ai le faaaloalo a Samoa i lenei itu, o le faasolo matou te le faatamala i ai, le mafai ona o le faaaloalo a le atunuu. Ae ua ou manatu ou te toe tulai atu lava ona o lea ua faaiu, ou te le manao foi e faalavelave le saunoaga a le Afioga i le Igoamatua. Ia ma lou agaga faaaloalo.

Tofa Ale Vena Ale: Lau Afioga i le Fofoga Fetalai pe a tusa ai ma lou finagalo i se avanoa...

FOFOGA FETALAI: O lea ua uma ona faaiu mai lau saunoaga, e manatu foi o oe o le alii matua le Igoamatua, o lea ua manino.

Tofa Ale Vena Ale: Lau Afioga, talu ai ona o le finagalo o le Afioga i le Minisita. Na o sina...

FOFOGA FETALAI: Ia saunoa ia.

Tofa Ale Vena Ale: Lau Afioga i le Fofoga Fetalai, o la e manino lava lau folasaga. Afai... a foi lea ua ou fai atu lau Afioga i le Minisita ma lena Itu o le vai, afai e le o talafeagai ma la outou faafofoga, ia toe faafoi mai. A o lena ua i ina le tofa ma le faautaga. O lau saunoaga foi i lau lafoga i le ula futifuti, se leai, o le fautuaga, e leai se mea e te popole ai, ioe. O le a le mea e atugalua ai lou finagalo, o lena ua i ina le Malo? A o matou manatu e tuu atu e fau ai le tatou faigamalaga i lenei 5 tausaga. Faafetai tele i lau Afioga i le Fofoga Fetalai.

FOFOGA FETALAI: Faafetai. O lea ua manino ma maua, faafetai lava foi le lagoalago mai o oe le Igoamatua i lau fetalaiga Ale ma... O nai mea lava e faapulapula atili aua foi le faafofogaaga a le atunuu. Ia, o le tiu lava lea o le Malo, o lea foi ua faafofogaina foi le faatulai mai, ia o aga lava ia o tatou fesuitaiga ma felafolafoaiga i totonu o le Maota, e pei o le Malo lava e faalagolago i ai aua le latou faamalamlamaina. Ou te talitonu o lea ua faamalalaina le finagalo o le sui usufono mamalu. Ia malo le tofa, malo foi saunoa, ua faafofoga ma le totoa le tatou Maota, ia malo lava saunoa faa-toeaina, e ese le manaia o le saunoaga faa-toeaina i lau fetalaiga Ale le Igoamatua, le sui usufono mamalu mai Faleata Nu.4. E talitonu lava o lea ua faafofoga ma le totoa le Afioga i le Palemia ma le Kapeneta aua manaoga o si ou itumalo. O le mea lea, malo faafetai, malo faa-toeaina, manaia le tatou Fonotaga pei ona saunoa.

Ia, malo faafetai. O le avanoa lenei mo se tasi o sui usufono o le tatou Maota Fono. Ia, ua matau atu o lea ua tulai mai le sui usufono mamalu mo Aleipata Itupa i Luga, le Afioga ia Fuaava Suluimalo Amataga, o lou avanoa lenei e te saunoa ai.

SAUNOAGA FAA-TAUPOU

Afioga FUAAVA SULUIMALO AMATAGA (Aleipata Itupa i Luga): Ia, ua faafetai tele atu i lau Afioga i le Fofoga Fetalai mo le avanoa o lenei itumalo o Aleipata Itupa i Luga. E avatu ai foi se manatu faatauavaa e tusa ai foi ma le Tala Faatatau Autu o le Tupe 2021/2022 aua le Paeaiga lenei Lona XVII o le Palemene.

Lau Afioga i le Fofoga Fetalai, o lea ua maea ona e sii le viiga ma le faafetai i le Atua i lenei taeao, ua faapea foi ona tatou tatalo ma tagisia le agaga paia ina ia tautoaluaaina sui usufono mamalu uma o le Maota Fono nei, ina ia faapena ona tatou lipoia le Tala Faatatau Autu o le Tupe aua manuia o Samoa. Ona ou manatu lea, o le a ta piiama faatasi i lou sa folau i lenei taeao manino ma le matagofie.

Ae ou te le i foaina la le papa nai le Pelua, e muamua ona ou asa le vasa ma le faaeteete, ina ne i soona soua le gataifale ona ou seu lea i le siu ma le popoe pei o le upu i le tao ma le atulagi. Ou te muai seu foi le tauvae o tupu

ma le totoa ina ne i lilifa faatipa le tauvao ona masoe faafale lea o le taaseuga pei o le upu i le tapue ma lona vao. Ua uluulu faafofolau le aso pei o le upu i le aiga tautai, aua ua sosofa faai'a o moana le taeao ma le aso. Ua taufai mapue foi le pasina ma le figota o le moana uli e pei o le upu i le aleaga. Ua lalago le tai o alii ua taaseuga nai le utaillesolo aua ua mapu'e le faailofanua sa matamatanonofa i ina, se i saili le faailoao pe toto faasau le taeao togotogo ae se i seu lalago le tafaga i itu nenefu i leiloa. Ae a le aso ma le taeao na liugalua? Ia lele ua saasaa faataliuta le faitaulau, ua fola malu tai o alii, a ua fao faavaafofolau le matega pei o upu i le galala i malae. Lele ua maaloalo le atu taatasi i le tupua na ee i fanuaea o le Tuiatua ma lalago le usileleia o fisaga i papa faafotuata. O se toga utulolo ae tata pipisa le utu a Siutaulalovasa, ua leleu le faamanuo i le loto o lano, ua mulivaiola i tualagomoa, ae o papa pau na lalago faaifo ai natialii o le latalua ina ua susue iu o fuesa o falaula ia i le vai suatoto. A o le mavaega a Tuiatua Tualemoso, o se malama mai lagi, e te lagi faasau i lou faleulu, i lou ipuniualii, e te mamalu foi i lou fale na polima. Lea la ua manino too o le vai o loimata, ua pele aao foi le fatigasa ae ufiufitai i lona faleulu, aua o lele ua mua, ua mua le aso.

O le alofa laveai lena o le Atua ua momoli mai ai lo outou soifua ma lo tatou ola, ua tatou lauluafesilafai ai pei o upu i le tamaitai o le Alataua. Ou te le toe tapisa la i le malaga e pei o le upu i le lagituaiva, aua o lele ua atoa lau i liu e pei o le tuumumusu nai le faatalatala se mata e emo. Tali mataua la le tuutuu mai lagi ae se i inu le fanoga sa i faatufugaga.

Lau Afioga i le Fofoga Fetalai, ou te muai faatulou i le paia o lenei Maota i Tiafau, o le malae o le faautugatagi a le atunuu i le afio o lau Afioga i le Palemia, o lo o e tu i matagiolo aua aso louloua i lou sa e folau aua Samoa ma sona manuia a taeao. Afio lau Afioga i le Sui Palemia, tainane Minisita o le Kapeneta, faapea foi le paia o Minisita Lagolago.

Ou te faatulou atu foi i lau Afioga i le Fofoga Fetalai aua o lau Afioga lava e faatonufofolauina le tatou Maota e tusa ai foi ma fuafuaga ua faagasolo nei a le tatou Palemene. Afio foi lau Afioga i le Sui Fofoga Fetalai.

Ou te faatulou atu foi i le paia o lenei itu o le Maota i le afio o lau Afioga i le Taitai o le Vaega Faaupufai e Puipuia Aia Tatau a Tagata po o le HRPP, aemaise foi le Sui Taitai ma sui usufono mamalu uma o le Fonousu a le atunuu i lenei taeao fou.

Ou te faatulou atu foi i tupu ma ee o tamalii uma o le atunuu ua tatou faatasi ai i totonu o le Maota, le paia i Ofisa Sili o Pulega, o Faalapotopotoga ma Matagaluega, aemaise e le galo ia matou la outou sao taua o lo o vae ma lima i ai le faigamalo aua le atiaeina o le atunuu ma lona tamaoiga.

Ou te ofo alofa ma faatulou atu foi i le faafofoga tapuai mai a Lana Afioga Mamalu Le Ao o le Malo ma Lana Masiofo, Afio lau afioga i le Sui o le Fono a Sui Tofia ma le faletua, lau Afioga i le Faamasino Sili faapea alii ma tamaitai o le faamasinoga. Ia o le paia lava lea aua tama ma Aiga, o Aiga foi

ma latou Tama, le Usoga a Tumua ma Pule, Ituau ma Alataua, Aiga i le Tai ma le Vaa o Fonoti.

O le a le mafai foi ona vaea le falaooto e faatulou atu ai i le faafofoga tapuai mai a o tatou uso i Amerika Samoa i Tutuila ma Manua i le Afioga i le Kovana aemaise foi le Sui Kovana, le Lutena Kovana ma le Faigamalo, o ou paia lava ia o le Faleagafulu aua Sua ma le Vaifanua, Fofu ma Aitulagi, Saole ma Saleaamua ma le Launiu Saelua, Faatuiolomotu, Tootoo o le Faleula ma upu ia oe le Manuatele.

Ia, e avea foi lenei avanoa faaauro ou te faatulou atu ai i Taitai uma o Ekalesia taitasi i totonu o si o tatou atunuu, aemaise o feagaiga taulagi o outou ua faaao i ai faalupega o Samoa o lo o faafalelemalu i tafa e fia ma faanonomanu aua se manuia o Samoa. Ia o paia na o Samoa si ou atunuu pele mai le papa i taū seia paia le papa na susu.

Lau Afioga i le Fofoga Fetalai, ae le i avatua se sao o lenei itumalo e tusa ai ma le Tala o le Tupe 2021/2022, ia e avea lenei avanoa se i ou faapai ai i si ou itumalo o Aleipata Itupa i Luga, mai Lalomanu seia paia Ulutogia. Ia o si ou itumalo e tasi lava le aiga, ae afifio i pitonuu e 3, o Lalomanu, o Vailoa, o Ulutogia.

Ia e faafeiloai atu ai i si ou nuu o Lalomanu, le paia lava lea aua le afio o le Afioga i le Tuiatua Faanofonofu, lau Tofa i le Matua ia Fuataga, afifio le Falefia o Alii, afio Amituanai o le Maopu o le Tuiaana, susu i laua Suafa, le Toafa o Tootoo ma le Igoamatua ma upu ia te oe Saleaamua.

E talitonu e le faagaloina foi le susuga i le faafeagaiga ia Rev Etisone Gafa aemaise o le faletua, a o tatou faatasi ai i le taimi o sauniga o le faiga palota, i lou foi sao i le itumalo aua le folafolaina o le upu a le Atua aemaise ia ulimasao le faamoemoe o le faiga palota a le itumalo.

Ou oo mai i si ou nuu o Vailua, susu le susuga i le Tama Sea Rev. Ioane Tupu ma le Peresetene o le Auso Fealofani le faletua ia Maria Tupu. O le paia lava lea aua le afio o lau Afioga Saumalu o le Sao Fetalai. Afifio le Falelima o Usoalii, Susu Puepuemai o le ao o le Mavaega, afio Palelei o le Aloalii, afio Fuaava o le Tapaau o le Salelea, afio Togafau o le Matua o Usoalii, afifio foi le paia i Alaalamalae ma upu ia te oe Saleleaalii ma le Matua ia Tualemoso.

E le faagaloina le susuga i le faafeagaiga ia Iosefatu Semi ma le Faletua ia Leafaitulagi ua fai i lagi le la tuligasia, ae lagona pea le agaga faagaetia ma le agaga faafetai, aua e le galo le la galuega sa tautua i totonu o Vailoa i Aleipata. E le galo fautuaga, aemaise o le tuualalo ina ia taulai i le Atua tapenaga o le faamoemoe o le faiga filifiliga a Samoa, ia lea ua iu ai ma le manuia.

E le itiiti le faafetai i si ou nuu o Ulutogia, i le susu o lau Susuga i le Faafeagaiga ia Rev. Kolia ma le Faletua, ia le paia lava lea aua le susu o Sagapolutele o le Tama a le Malo, le Matua ia Falanaipupu, le taofia a Taiiai

ma le Usoalii ma le mamalu ia te oe Saoluafata. O paia na o si ou itumalo e pele i le agaga.

Ia lou itumalo e, avea ia lenei taimi e faaleo atu ai se agaga vaivai o la outou auauna faatauvaa. E momoli tele atu ai le agaga faafetai e tusa ai ma la outou puleto ma la outou faaeaea. A lele ua tu mai lagi le lagaali a Tamafaiga? A o ai foi lou nei tagata ua outou manatu mai ai e ala i le faiga filifiliga a Samoa? E talitonu sa tauala mai i la outou filifiliga le finagalo o le Atua e fai ai au o se auauna faatauvaa ma o tatou sui usufono i totonu o le Palemene o Samoa mo lenei 5 tausaga. Faafetai la i la outou faaaloalo, lou itumalo e, o le a le asoa i lou ua pe seiina foi i lou taliga lau faaaloalo, ae o le a teu i le va o lou fatu ma lou mama. O taimi uma ou te manava ai, ou te manatua pea lau faaaloalo i aso uma o lou ola.

E avea foi lenei taimi ou te faafetai atu ai i nai uso sa matou tausinio i le faiga filifiliga, le afioga i le Maopu o le Tuiaana le Afioga Amituanai ia po o le tofa foi ia Fagaivalu, o le sa seei mai i le tofi faipule o Aleipata Itupa i Luga i le Paeaiiga ua mavae atu nei. Aemaise lau Tofa Taua po o le Afioga foi ia Taufua Etimani. E moni a le upu, e fetaai lava ma taalo tama a o le uso. Aua ne i galo o tatou lava o ni lala e tupuga mai i le pogati laau e tasi. O upu i lo tatou itulagi, o Atua o le nuu, a o Aleipata o le aiga. Faafetai taaalo faatausala, malo le taaalo faatamalii. Faafetai foi i le lua lagolago ua lua tuuina mai i le tatou feiloaiga mo lenei 5 tausaga ou te taumafai ai i se upu i se sao o le tatou itumalo aua upufai o le atunuu.

Ia o foliga vaaia ia o le tatou fealofani, aua e vevesi solo isi itumalo i gasegase a Malo ma faamasinoga, a e a Aleipata Itupa i Luga? Sa fifilemu lelei lava. O le pine lea o le itumalo o lo o fusia le talalelei, lava le faatuatua i le Atua, lava le tofa, le utaga mamao mai ona mauga tetele, aemaise le Tuiatua Faanofonofa ma le paia i Alaalamalae. O tatou lava o le uso, o tatou o le aiga, e tasi le toala fanau, e tasi lo tatou faasinomaga.

E fia faamauina foi le faafetai i le sa tulai mai i le foe i nisi o Paeaiiga ua tuanai atu, le Susuga i le Aoa Fesoasoani po o lau Afioga Amituanai, ia o le Maopu o le Tuiaana. Faafetai i lou gapatia ma lou maosiosia aua le tauaveina o le finagalo o lo tatou itumalo i upufai o le Maota o Samoa. Ia alofagia e le Atua lau Afioga, e le manuia foi le Atua. A lea ua faailo mai manuia o le Atua? Lea ua faatasia oulua ma le Faletua fou ia Lina i le sakalameta paia o le faaipoipoga, o lea ua amata ona see mai manuia i lau Afioga. Faafetai foi i lou lagolagosua i le tatou Vaega Faaupufai e Puipuia Aia Tatau a Tagata. E ui lava ina mamao Aleipata, ae te taumafai mai lava tatou te faatasi i Petesa i a tatou faatasiga ma le tatou ipukoko i faaiuga o vaiaso taitasi. Faafetai i le uso i le lotonuu, faamalo foi le faamaopopo.

Lau Afioga i le Fofoga Fetalai, avea foi lenei taimi ou te faafetai faapitoa atu ai i lou nuu i Vailoa i ona tulaga faalupu. E ui lava ina faailagi le tuligasia a le Aiga Sa Tagaloaalagi, i le tuua o le Malo e le Afioga i le Saofetalai le Afioga ia Saumalu, i nai masina ae le i faia le faiga filifiliga a le atunuu. E

talitonu e le o so tatou loto po o so tatou malosi, ae ua faia lava le finagalo o le Atua. Sa tatou tatalo foi ma faamafanafana i le paia o le aigaalii, aua le tuua o le Malo e le Afioga ia Saumalu o le Saofetalai. Tau ia ina ia taulu taulu ia pau se toa ae toe tulai mai se isi toa e nofoia le nofoa o Tavita aua le tausiga o le aiga, o le Ekalesia ma le tatou nuu o Vailoa.

Faafetai atu foi i au paaga, o au uo mamae, aua o lea e leai ni Komiti o faatagaina ma nai ou aiga i Samoa nei ma atunuu e mamao i la outou lagolago sa faapea ona tuuina mai mo lou nei sui usufono. E ui lava i faigata ma luitau sa fesouaina ai le galuega, a o le faatuatua lava i le Atua na mafai ai ona faafoe ma sagatonu faataumua folau lo tatou sa agai i le matagi. O lea ua taunuu ma le manuia le tatou folauga. E le o ia te au se tau ai ae ua na o le Atua e pulepuletetele e faamanuia ma tauia lo outou agalelei ua mafua ai ona ou seei i le Nofoa o le tatou itumalo.

Lau Afioga i le Fofoga Fetalai, ou te fia avea foi lenei avanoa ou te faafetai faapitoa atu ai i le matou Vaega Faaupufai e Puipuia Aia Tatau a Tagata le HRPP, lea foi sa taitaia le faigamalo i le Paeaiga ua mavae. E tele galuega lelei sa faia ma maua ai foi e nai o tatou tagata le ola fiafia, le nonofo fifilemu ma maua le saolotoga, leai ni vevesi, leai ni poloka, leai ni upu masoa, upu tau faifai, faasalalau lea i upega tafailagi, o Samoa ma atunuu i fafo. E talitonu o galuega sa faia e le faigamalo talu ai, sa afifi ai le ola tauivi, tauivi ina ia siitia pea le tamaoaiga o aiga, o nuu ma Ekalesia. Lea ua sii atu ai Samoa i se tulaga maualuga i le faatulagaga o atunuu e feoloolo le tamaoaiga i le lalolagi po o le middle incomes countries mai le lio sa i ai o atunuu e vaivai lo latou tamaoaiga o le LDC po o le Least Developed Countries. E faafetai atu ai i le Taitai ma le Sui Taitai ma le Vaega Faaupufai i le latou talitonuina foi o lou sui usufono faatauvaa, ia e tauva i lalo o le fua o le HRPP.

Lau Afioga i le Fofoga Fetalai, ona ou oo mai lea i le Tala Faatatau o le Tupe. Ia ae e le i avatua se faamatalaga, ia e muamua lava ona ou faamalulu atu, i le paia o le Maota nei aemaise le faafofogaaga a Samoa, e i ai se upu ua laaloa ua le tautamalii i le faafofoga, ia e poto lava le tautai ae e i ai lava taimi e pisi ai le sami. O sou sese ia faapena ona faamagalalo.

Ae i le Tala Faatatau Autu o le Tupe i le 2021/2022, ia e muamua ona momoli atu ai le faafetai i lau Afioga i le Minisita o Tupe, aemaise le Matagaluega i le Pule ma le aufaigaluega. Ou te talitonu o lea ua uma ona outou tapena lelei faafafine toaga lenei faamoemoe aua e le faigofie, ma o le a fai atu ai ni manatu vaivai i lenei itumalo i le Tala o le Tupe ua opea i le Maota nei.

Lau Afioga o le a agai se faamatalaga i le mea e tatau ona i ai le faamuamua, ia ona o lo o i ai lava tulaga o atinae o lo o faapena ona tagisa mai ai si ou itumalo, ia aua le ola fiafia i se tamaoaiga lelei i tua i le itumalo o Aleipata Itupa i Luga. Ia o le a faamuamua atu ia le Matagaluega lea o Galuega, Felauaiga ma Atinae Tetele.

O lea ua saunoa le sui usufono o le Vaa o Fonoti, lau Afioga i le Minisita, lau Afioga Olo, o le a ou le taua le isi Olo. E tasi lava le Olo e na o le Olo o le alofa. Ia ua matau atu ua tele le pau i lalo o le Tala Faatatau ia mo au Matagaluega, vaavaai atu ua pau i lalo pe o se mea o le \$12 miliona, ia po o le 15% lea i le Tala o le Tupe talu ai. O lona uiga ua vaavaai atu, ua faataatiaese ia le tele o galuega atinae po o capital investments. Ia e tupu ai le tamaoaiga, maua ai nai returns foi lea, ia ae atonu ua ese le mea lea ua ave i ai le faamuamua.

Ia e i ai foi se vaivaiga a lou nei sui usufono, ia e pei o le Social Sector lea ua ave i ai le faamuamua, ia ma e talitonu o le consumption mode lea ua... e i ai se vaivaiga e le tupu tele ai se atinae i se tamaoaiga. Ia aua e i ai le manatu e tele foi tulaga faapea e ave i tua, ia ona tau i ai lea o le agaga foi lea i le mamalu o le atunuu, o le a tau nofoai ae e le gaiou ma galulue, ona o lea e i ai faamanuiaga e avatu e lo tatou Malo.

Ae o le atinae lea e tatalo atu i lau Afioga, le Minisita o le Suavai paipa taumafa lea, i matou nuu i uta i le mea lea na agai i ai ina ua uma le Tsunami. Amata mai lava i uta i Lalomanu seia paia Ulutogia ua i ai ia auala galue, ma ua nofoia foi, seivagana ai ia Vailoa, o lo o i ai ia lo latou aualagalue atonu ai o i ina i lau Afioga ia le talosaga, na aumai i le faaiuga o le tausaga lea na tea. Ia ae o le vaitaumafa lea, o le taimi nei o lo o faagaioi lava ia le galuega a le tatou Pulega o Suavai, o lo o lau lava e loli a nai aiga nei i uta i le matie lea, e le au i ai se vaipaipa ona o le tatou pamuvai, ia e tu i tai i le mea o lo o i ai le falemai.

O uta na i le tele o tausaga ua tuanai, sa na o le pamu lava sa i ai i ina. O le taimi lenei, a toe sau mai i uta le tagata i le mea la e nofo ai, e latalata atu le sau i tai i le talafatai, ia i le mea o lo o i ai le pamu. Ma e i ai le talitonuga ua le gafatia, aua e pamu atu i le tane la e i gauta atu i le falemai, ona faatafe lea, e gravity feed le suavai, ae e faapena ona matelaina i latou o lo o nonofo i uta. Ae o le tatalo lena i lau afioga, ma ou te mataua foi, ua uma ona tapena le Pulega o Suavai i ia fuafuaga. Ona o tausaga ua tuanai sa ou i ai foi i totonu o board o Pulega o Suavai, sa o latou tapenaina ai le vaega lea o le Phase 1, e amata mai Lalomanu i le vaega i uta, ona faataatitia ni paipa vai o suavai taumafa, aua le mamalu o lo matou itumalo o lo o alala ma papaaao i lea vaega. O vaega uma ia, e pei ua agai uma i ai, ina ua maea le tsunami, a o uta foi, e fai foi si aega ma maualuga nofoaga ua agai i ai le mamalu o le itumalo. O lea ua faafofoga mai le itumalo, ma o le a faatali mai i se finagalo o lau Afioga i le Minisita o Olo le alofa.

Ona faagasolo mai lea, o lea ua uma ona avatu se faamatalaga. I le aualagalue o Vailoa, atonu o lo o maua i faila i tausaga ua tuanai, o lo o i ai le talosaga, se i alofa ane i ai, e tasi lava le aualagalue o lo o agai atu i le mea o lo o i ai le faleaoga. A o le isi pitonuu atoa ua taloto atu lava i lalo o vainiu le auala o le aiga e afe ai i tua, i le mea lea e i ai o latou..Ae sa i ai le aualagalue muamua sa i ai, ua toe foi lava i le le toe mafai ona alu ai se

taavale, ona o tulaga ua pei ua tulitasi i le pito i le isi pitonuu, o lo o i ai le aualagalue lea ua faata, na o le faleaoga ma le service ina o le tatou peapea e i tuamaota o lenei nuu. Ae o lo o i ai le isi vaega o le matou nuu, o lo o tagisa na i aiga ia, ona o le faigata o le mea e agai atu i mea o lo o i ai o latou maota.

Tatou agai atu i tai i le aai, o lo o i ai se vaega e le i faasopolia lava le taligalu, Lalomanu i Lata, e faasolo atu ai i le pitonuu o Faga seia tau atu lava i le solotele la a outou tau atu ai, ia..A alu atu le taavale maualalo, e laki ae sao ai, ua fai si lauleaga o le solo lea. E tatau ona fai i ai se fuafuaga faamolemole. E manaia lava le seesea atu o le feoai o le mamalu o le atunuu, ae oo atu loa i le vaega lea, ia a alu nei le taavale i lalo, e toeitiiti a le iloa atu le afi o le taavale i le loloto o omoomo o le auala. Ua manaomia se toe faaleleia o le tulaga lea.

O tulaga i tatou turisi, silafia foi i le tamaoaiga o le itumalo, o lo o faalagolago lea i le aumaimoa mai fafo tafafao mai. O le tulaga o turisi, o lo o i ai le tulaga e pei ona tulai mai i le tsunami. E le mafai ona agai sao se isi i luga o le tafa lea, ae toe tuli mai lava le aualatele, seia tau mai le magafa lea e i ai le falesa ma agai ai i uta. E i ai le talitonuga a toe tupu mai se tsunami...Aua na faapena le mea na tupu, o na i aiga na omai i taavale e tuli mai le itu lea, na maua mai lava e le galu, ma ua faapena ona aafia ai ma maumau ai le soifua. Ona e le i i ai ni latou auala lea e faapea mo evacuation route po o escape routes ina ia faapena ona vave ai ona ae i luga o le mapue, ma aluese mai ai i le nofoaga e agai mai ai mala faale-natura.

E i ai le manatu o se tuualalo, i le tulaga o le taumafaiga o le suavai o le matou itumalo. O le taimi nei, ou te iloa po o le 1980 la e i ai le vaipamu la e i Lalomanu, i luma ane o le falemai. Ae o lea foi suavai e maua mai ai, ua maua i le tulaga ua faasualua. Ae ua tele le demand le consumption lea ua manaomia, ua toatele foi tagata ua tofua paipa ia aiga, i tai i le aai. Vagana ai nofoaga uta, i latou na see mai i uta ina ua uma le tsumani. Ae o se tuualalo a fia saili, o lo o i ai foi eleele o Vailoa, e ono tapena i ai se sailiiliga. Aua o le taimi nei, o lo o i ai le observation pore hole i eleele o Vailoa. O lo o sailiili ai le suavai po o lava le mafiafia ma le tele o le vaimagalo, o le a foi lona loloto, o le a foi lona lelei i le mama, aua le soifua maloloina.

E le tau faamatalaina le aoga o le...e iloa lava i le igoa o le nuu le mea e tele ai le vai, o Vailoa po o le Vaivailoloa. Atonu foi o lona tou te silafia o i lea na sau ai le tama ma lana tauaitu lea na magotogoto ai ma vaivaia Faleata, lea e tele ai le vai ia Ale ma lona itumalo. O le tulaga lona o le vai lea na tufa mai, ae o la la e pei e matelaina matou, ae o lo o tele le vai o lo o i lalo o le manava o le eleele e fesoasoani atu i le pore hole lea e i Lalomanu, ma isi vaega o Aleipata. Aua e ese ai le vai fou lea na vili i Saleaamua, o lea ua ola atu ai lea vaega mai Amaile seia paia atu Mutiatele, Pue ma Malaela, o Saleaamua ma Samusu ma vaega uma ia.

O se tuualalo lea e tuuina atu i lau Afioga, ae e i ai le tulaga e momoli atu ai le faafetai i le Pulega o le Suavai. Ona o le talisapaia pe a valaau atu, e faaaauau pea le latou auunaga i loli vai ia e faapena ona fesoasoani i tanevai a na i aiga o lo o i uta. O le tulaga lea aemaise o taligalu ia ua taua atu vaega e le i oo i ai taligalu. O lo o tagisa mai lava na i aiga. Ona o le galu ma tulaga o le oneone ua faapena ona tafia atu.

Ona tatou agai mai lea i le Matagaluega o le Soifua Maloloina. O lea e vaai atu o lea e i ai si itaga i le tala faatatau, pe \$4.2 miliona. E tatalo atu o le falemai o Lalomani, e tele itumalo o lea e service ina. E lavea atu ai ma Lepa ma Lotofaga, e oo mai foi nisi o tafa mai o Falealili. A o lau matau i ai, ua tele ina faaletonu tulaga o le fale o lo o faapena ona faataotolia ai aemaise lava tulaga i faleletaua, aua a tau loa falemai, o se mea e tatau ona mama, matagofie ma faigofie ai ona tea le mai. Ae a matau a asi atu mai, e toe faateleina le mai pe a agai i fale ia. O lea e tatalo atu ai se i alofa ane lau Afioga i le Minisita ma le Matagaluega ina ia faapena ona vaavaaia le auunaga lea ia faaleleia aua i latou o lo o faapena ona avatu i ai i le falemai i Lalomanu.

O lo o i ai foi le agaga ona e i ai le tulaga o feuiaga ma tulaga foi lele o taavale, e i ai se tasi o ou aiga na i ai le tulaga lea na fiu e faatali se ambulance foi lele e aumai ai. E le mafai foi ona aumai i se isi taavale ona e manaomia totoga na faatotoga ai taavale ia ia taumafai e talitali ai mai ina ia oo mai i Apia nei i Motootua aua togafitiga aemaise lava mai tigaina. Ua maua le tala ua alu atu ae ua toe valaau atu foi ua i ai le isi mea ua alu i ai le faamuamua. Ia ona afe lea i ai o le ambulance lea ae le alu atu i tua, faatoa toe oo mai le mai mai le taeao ua po ae taunuu atu le ambulance ua maliu le mai ia ona aumai lava lea e le ambulance iinei i le fale maliu.

Ia, e tatalo atu pe le o i ai se vaega foi lele e i ai se ambulance e tau service ina Falealili ma tau latalata ane foi lele a i ai se mai tigaina e fia vave aumai, ia a o lo o taulalata aua a alu atu i nei i Apia, lona uiga e tolu lava itula o le atu atu ma le toe foi mai. E faailoga fesili la pe gafatia i lena taimi ina ia tumau ai pea le malosi ma le ola o le mai ina ia oo mai i Motootua mo togafitiga.

E toe fia faaoo atu pea se leo o le itumalo, o lea ua uma ona laga atu e nisi o sui usufono le tulaga lea o le tatou faamai lea o le Koviti-19 po o lea foi ua i ai le isi igoa fou lea o le isi foi uso o le Koviti-19 po o le Delta ea po o le a le igoa lea e faaigoa ai. O lea ua aafia Tutuila, Amerika Samoa. O le matou itumalo e tuaoi ma Tutuila, ae i ai le agaga foi lele e toe faaopoopo atu pea le tatalo ia tautuana le tatou faasa lea i tatou border control ina ia faapena ona taofiofi pea, ina ia aua ne i vave ona oo mai. I aso lagilelei, a e tutu i matafaga o Aleipata e te iloa lelei atu le motu o Tutuila ma atumauga ma tulaga uma faapea. Ou te le mailoa i ai i le tulaga o le faamai pe mafai ona ausia i se mea foi lele i pipii ane i se atigifagu po o le a se mea i tafetafae mai i tulaga foi ia o taetafae ae sau toa i Aleipata aafia atu ai se isi o lou

itumalo. E pei o le popolega lea. Ou te vaai atu o la e ataata mai Niuava aua o ia e siusiu i o, a o au lea a sau le taetafe lona uiga e muamua toa i Aleipata lavevea ai tagata o lou itumalo. O lea e tatalo atu ai le Matagaluega o le Falemai ia faamalosi pea le tatou puipuiga. Aua ou te iloa a lavea loa le toatasi, ou te le iloa po o le a le tulaga o le sosolo o le a sosolo ai aua o le natura lava ia o le aiga Samoa, e laki atunuu i fafo aua na o le isi lava aiga na te le iloa lona neighbour, a o tatou e tumutumu aiga i faalavelave ma mea e fai aemaise foi o faigalotu ma tulaga uma faapena. Ia o le a faafaigata ai lava ona malupuipua le tatou atunuu pe a aafia se toatasi lava ona oo lea o tatou i se tulaga e sili ai lava le puipua i lo le tatou toe vevesi e toe saili le togafiti.

Oo mai i le vaega lea o le Matagaluega o Aoga, Taaloga ma Aganuu. Faafetai o lea ua maua atu o lea ua i ai le siitaga. E \$2.5 miliona lea e siitia ai totogi o faiaoga, ae i lea foi vaega, e tatalo atu ai ona e i ai vaega foi ia e le o lava faiaoga. O lea o le a siitia totogi, ae i ai lava le matou talitonuga o le matou itumalo, e le o lava faiaoga. O le faleaoga i Vailoa ma le faleaoga i Ulutogia, na o le pule ma faiaoga e toa-2. I lau matau i ai a agai mai lava le pule i fono aemaise o nisi o manaoga o le Ofisa Tutotonu i le faiga o le process ina o tulaga, e lua lava faiaoga e faiaoga, ae o le vasega 1 e tau i le vasega 8. E te manatua foi a omai matou i Aleipata a e sau loa i le taeao ua uma le aso, aua e leai ni penisini ma ni mea foi nei e sau toe alu atu i le atoa sau. Aua a e sau ma e toe alu atu e te le tu e fai sau feau, toeitiiti lava 3 itula e alu ai, ua afa le aso.

Ia, a o le tulaga lena e tatalo atu ai, se i silasila ane le tatou Matagaluega i aoga pe i ai se vaega foi lele e toe faaopoopo ai ni nai faiaoga, faiaoga faataitai. O le taimi lena i si ou nuu o Vailoa la e ua fai le matou polokalame, pe toa-4 ea toa-5 nai alo ma fanau a le matou nuu. Ia sa feoloolo atu lava i Kolisi ma mea faapena a ua le maua ni galuega, o la e fai i ai e o faataitai i faiaoga, po o trainee foi ia e faa-part time ai, ia, o la e la ua taumafai ina ia assess atu e le Ofisa ma tau certify ai foi lele, ou te le iloa pe fia ni nai tausaga e faataitai ai le galuega faafaiaoga, atonu e maua atu foi se galuega ma tulaga faapena e tau fesoasoani ai i le polokalame. O la e la e tele a i le taimi lena e voluntary le latou galuega o lo o fai, ae o lo o totogi e le nuu sina seleni laititi e fesoasoani ai i nai o latou aiga, ae o se tulaga lea e toe tuu atu ai le fetuunaiga o le siitaga lea, ina ne i te i foi ua mamao ese lava le siitaga a faiaoga, ae i ai foi nisi o atugaluga po o ni faasea foi mai isi sectors. Ina ne i te i foi ua faapea ua faatuatuanai atu ia i latou, ae ave le faamuamua i faiaoga.

Ia ae o lo o i ina lava le tofa tou te silasila i ai i tulaga ia, ma le tatou grant foi lele le one government school grant. Se i silasila ane i ai, aua ou te vaai atu i ai pei sa i ai sa \$18 miliona ae pei lava o lea ua toe pau i lalo i le \$17.7 ea. Pe le tatau ona i ai sina siitaga, aua o lea pe \$1 ea i le tamaititi. E fuafua le tupe maua e le aoga i le aofai o tamaiti e i ai, a o lea sa saunoa foi nisi o sui usufono i lena taeao, ia pe siisii atu i luga i le \$120 a maualuga a ua

\$150, pei o le tulaga foi lele ina ia lava pea resources foi ia e faaleleia ai ma faatino tatou aoga.

Ia, ona ou oo mai lea i le Matagaluega o Pisinisi, Alamanuia ma Leipa. E matau atu i le Tala o le Tupe i i, e tele lava le siitaga. O se mea o le \$7.6 miliona po o le 38% foi lea o le paketi talu ai, ae ou te vaai atu e tele lava le vaega lea e alu i ai i fesoasoani foi ia i pisinisi ma le tatou tourism, le sector lea. Faafetai o lea ua i ai le tulaga lena. Aua e pei lava ona fai atu se faamatalaga i le taimi ua sola, ia o le toatele o si o matou nuu aemaise lava Lalomanu e faamoemoe lava i le turisi aua le tamaoaiga, faaleleia atili. Aua o le tele o nai pisinisi ia, ua toe faamalolo uma le aufaigaluega, ua leai ni tupe e totogi ai. Ma ou te iloa foi ua faigata le maintenance o latou fale foi na fau ona o le tulaga pagatia ua oo i ai le lalolagi ua leai ni tatou tagata maimoa mai ia e faaoga i ai ma maua ai nai seleni. Na o le pau se tulaga e faafesili atu ai, po o le a le allocations o mea ia, po o categorise foi lele aua o lea e faapea o pisinisi ma tulaga tau i pisinisi turisi ia, o lo o lavea atu ai ma faleaiga, ina ia fetuutuunai i se tulaga talafeagai. Aemaise foi o tulaga, aua ou te iloa o le toatele o nai pisinisi ia, o la e tau togitogi foi loans ua fiu foi e tatalo i faletupe ina ia faamama mai le tului ma tulaga faapena, ae o le tulaga lena e tatalo atu ai i le vaega a le tourism i lalo o le allocation lea i lalo o le Pisinisi, Alamanuia ma Leipa.

O le tatou RSE Scheme, ia, e i ai sina forecast foi lele po o le a se tatou protective i le mea e i ai nei ona o le faamai, po o le mea ea o faatupulaia po o le mea ua tau augatata Niu Sila ma Ausetalia e avatu o tatou tagata, ona ou te iloa i le taimi nei o lo o faamuamua le... e tau fuafua i ai... aua o lea sa outou silasila i le taimi na agai mai le mamalu o le atunuu e resitala, ia o le matua tumu lava o tagata ua fia saili galuega. Ae manaia se tulaga o i ai se tou protection foi lele, po o la e tele lava galuega o lo o maua mai le scheme lea i Niu Sila ma Ausetalia. Ia o lea foi na maua i saunoaga a nisi o sui usufono, ia e pei e manaia foi Tutuila, ae pei o lea foi ua lavea. Ia e pei o tulaga uma ia se i tatou sailiili pea, o fea se mea e lelei pe saogalemu foi mo si o tatou atunuu.

Ia ona ou oo mai lea i le Matagaluega o Faatoaga. O le Matagaluega o Faatoaga e le tele se tulaga foi lea o se siitaga i lana Tala Faatatau o le Tupe. Ae na pau lava le tulaga lea e taumafai atu ai se faamatalaga, o lo o i ai le pulega fou lea o oloa e auina i fafo, lea e faapea e \$250,000 lena e allocate ai. O sina faamalamalamaga foi lele i tulaga ia i ana matafaioi a o a foi mea e gata mai ai ma tulaga uma faapena, ina ne i te i ua uma ane ua tu foi le isi i le aao o le isi ma mea faapena foi lele, pe le o i ai se vaega o le Matagaluega o lo o faatinoa lea vaega. Aemaise foi o le tatalo atu i tatou asosi o le aufaifaatoaga, o lo o i ai foi le asosi faifaatoaga i si o matou itumalo o lo o taumafaia tulaga tau lafumanu. Ia aua ua taumafai foi i le talo ae ua tulaga faaletonu i le taimi lenei. Aua o le upu e tau leai se maketi o lo o agai atu ai i fafo ae o lafumanu lea ua agai i ai, ae manaia le tulaga foi lele e taatia atu

i le tou polokalame ina ia faapea ona faaleleia ma siitia ai le alualu i luma foi o ia asosi aemaise o le latou auauunaga i le tausiga o nuu ma ekalesia ma le itumalo.

Ia, e avatu foi le agaga faafetai o lea ua maua i le Tala o le Tupe le pau o le resitala o alia. E le i maua i ai pe fia se tulaga lea ua pau ai, ae taua foi mo lou itumalo aua tasi lea ogasami e agai uma atu i ai le tele foi o vaafagota. E le gata i lea, ae ua i ai foi lava isi afaiva foi lea le au fai faguea ea pe a e tele ina o atu ona tutu lea i togavao aua ua tele ina faasa e itumalo ona toe fagotaina le latou gataifale, ae ua o atu pogisa ona agai lea i o ae toe foi mai le taavale faatoa toe piki foi lava i se taimi foi lea, aua e tau mai ai e ala ona mamao le mea e o atu ai, lona uiga e tamaoaiga. Aua tasi lea vaega o le atunuu sa fai ai le reserve lea sa fund i lalo o le IUCN. Ia, ou te iloa la o la e tupu ma ola le gataifale, a o le tulaga lena se i mataitu ane tulaga ia.

Ia, ona ou oo mai lea i le Vaega lea o Fesootaiga, Faamatalaga Tekonolosi, o lea ua vaai atu ua tele lava le siitaga, toetiiti lava 50% le siitaga o le Matagaluega lea, ia ae ou te iloa, e mafua mai i le, e i ai le \$2 miliona lea e tuu atu i ina mo le tatou free internet foi lele mo aoga. E toe avatu pea i le tulaga lea po o le a se tulaga o i ai le tatou Broadband System foi lea le SNBH pe o se vaega ua le gafatia e lena system po o se mea fou lea e fuafua e fai atu ai i le \$2 miliona lea. Atonu o i ina lea ua atagia mai ai le siitaga i luga toetiiti lava \$4 miliona le siitaga a le Matagaluega lea. Aemaise foi o lo o i ai nisi o service lea e i ai lea le \$300 i le Digital TV, po o le mea o tau tapena se TV a le tatou faigamalo. Ia po o le a le tulaga lea ona o lea e i ai le allocation, ona o lea e matau atu e le i i ai se allocation i le Tala o le Tupe i le Nofoaiga ua tuanai i le 2020/2021.

Ia, faasolo mai lea i le tatou Matagaluega o Punaoa Faalenatura ma le Siosiomaga. Ia pau lava le mea lea e maua i le lauga autu o le paketi, o lo o ave le tatou faamuamua i le toe totoina lea o le vaomatua uma o Samoa, lena e i ai le allocation lena e \$1 miliona. Ia, e ui lava ina pau le Tala Faataatau po o se mea laitiiti ane i le miliona.

FOFOGA FETALAI: Na o se fesoasoani i le sui usufono mamalu. O lo o i ai le avanoa o iloilogia auiliili, ae matau atu i le saunoaga a le sui usufono mamalu, pei ua tau auiliili mai le tatou Tala o le Tupe i lau saunoaga faalauaitete. Ae o lo o i ai lava o tatou avanoa pe a oo ina auiliili le tatou Tala o le Tupe.

O se fesoasoani atu lea ae faaiu maia lau saunoaga o le a oo i le tatou malologa.

Afioga FUAAVA SULUIMALO AMATAGA: Ia, ua faafetai tele i lau Afioga i le Fofoga Fetalai e tusa ai foi ma le faamaninoga o le tulaga lea ona ua agai foi i ai se faamatalaga. O le atugaluga ne i te i ua leai se isi avanoa ae o nai mea laiti lava ia. Faafetai i le tulaga lea o le tatou vaomatua, o lea

foi ua maua o lea sa faataunuaina le tatou \$2 miliona lea sa amata mai le faaiuga o le 2015 mo le 5 tausaga, o lea ua maua atu pe \$2.2 miliona.

E momoli atu ai le agaga faafetai i le Matagaluega, aemaise foi o Minisita sa i ai i le faatinoga, o lea ua tau lau o lea faamoemoe. O lea foi la ua toe amata atu. Pau la le mea po ua i ai ni tatou targets foi ia ua fuafuaina mo le isi foi polokalame lea o le toe totona o le tatou vaomatua po o le a le taimi e ausia ai aua o lea ua i ai allocations ia tai \$1 miliona lea ua tuu i ai.

O le tulaga i le Matagaluega o Leoleo, Falepuipui ma Tinei Mu, ia, ona o Lalomanu lea e center atu i ai le post lea o lo o vaaia le tafa lea i sasae o le atunuu, o lena e iloa atu o lena e i ai se siitaga. Ae ou te le iloa po o le Police Academy, ae manaomia sina vaega o le seleni lea e faaleleia ai tatou outposts ia, aemaise le vaega i Lalomanu i le tulaga o le faatotogaina o auaunaga aemaise foi resources i tulaga o taavale ma mea faapena foi lele. Ia o lo o sologa lelei pea galuega a anai malu o le Malo, e faia lava i luga o le mafa ma o i Vaipu a latou siaki, a latou check point foi ia, aua le tau mataituina o le au onana ma le vaega foi ia feoai le laisenea ma lavevea atu ai lea ma isi tagata o la e feoai i luga o le alatele. Ia e manaomia la resources ia e faaleleia atili ai le latou auaunaga ma tulaga faapea.

Ona tatou oo mai lea i le Vaega lea o Tupe Maua. E momoli atu le agaga faafetai. Ua maua pe 1% ea lea na agai ai i luga le tatou tupe na ao mai, collection i le Tala Faaletupe lea na agai atu nei. E fia faamauiina le agaga faafetai i le Matagaluega ma le latou galuega sa faatino.

O le Matagaluega o Tina, Tamaitai, Nuu ma Afioaga ma Agafesootai, ia, ou te iloa o lea ua tele atu foi nisi o finagalo ua faaalua. Ae pau lava lea o le tulaga, na o se agaga foi lele, o le tulaga foi lele ne i te i ua avea tulaga ia, leaga o lea na saunoa le Minisita o Faatoaga mo mea o poloketi, ae leaga o lea sa i ai le manatu pei foi ona sau i le faalogo, i mea sa feaveai i luga o ualesi mosooi ma tulaga faapena, e faapea o le tufa. O le tulaga lena o lea... ae afai o le tulaga lena o lea ua saunoa i ai le Minisita o Faatoaga, ia, o le tulaga foi lele ne i te i ua avea ma mea e alo i ai le mamalu o le tatou atunuu, o le a faapaie ai loa le tulaga o le tuleiga o le atinae ma tulaga faapena. Ae o le a faatalitali tini mai, o lea e i ai nai miliona lea e agai atu, aemaise foi la o le tulaga lea po o i ai ni aiaiga foi ia po o ai le itumalo, ne i te i ua i ai itumalo e tele mai latou applications, ae leai nisi.

FOFOGA FETALAI: Ua ou vaelupeina le saunoaga a le sui usufono mamalu. Ou te talitonu foi o lea ua tatou oo mai i le taimi o le tatou malologa. Ae talitonu lava e le mafai foi ona tuua e le Nofoa e avatu pea le faamanatu i tatou sui usufono. Talu ai ona o lo o i ai lava le avanoa mo saunoaga faalauaitete i le tulaga tau tupe ma le tamaoaiga, aemaise foi faiga faavae tau tupe. O le auiliiliga o le tatou Tala o le Tupe, o lo o i ai avanoa tai 15 minute, e lua avanoa. O le mea lea e fesoasoani atu ai i nisi foi sui usufono o fuafua mai ina ia tau tuli le tatou taimi faatapulaaina.

O le mea lea, ua i ai le tulaga e faasilasila atu ma le agaga faaaloalo i le tatou Palemene, o le a faataatiaese Galuega a le Fono Aoaofaitulafono mo lana malologa masani, tatou toe feiloai i le itula e 2:00 mo le faaauauina o le tatou galuega.

Mo le silafia e le Maota, o lea ua tapena e le tatou Ofisa le taumafataga mo le aoauli e talisua ai foi aua le sailiga malosi. E faasilasila atu ua faataatiaese nei Galuega a le Fono Aoaofaitulafono mo lana malologa o le aoauli.

Na faataatiaese Taualumaga a le Fono Aoaofaitulafono i le itula e 1:01 i le afiafi.